

MESYUARAT KETIGA, PENGGAJ KETIGA
PARLIMEN KEEMPAT BELAS
2020

HARI RABU : 25 NOVEMBER 2020

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN YAAKUB
[MACHANG]**

TARIKH : 25 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah mekanisme yang akan dilaksanakan oleh Kementerian bagi mengawal pemaju daripada berterusan membina projek perumahan yang tidak bertepatan dengan kehendak pasaran serta membendung lambakan rumah baharu di dalam negara.

JAWAPAN

Tuan Yang di-Pertua,

1. Untuk makluman Yang Berhormat, kelulusan permohonan pembangunan sesuatu projek perumahan yang dimajukan oleh pihak pemaju swasta adalah tertakluk kepada Kebenaran Merancang (KM) dan Pelan Bangunan yang diluluskan oleh Pihak Berkuasa Tempatan (PBT) / Kerajaan Negeri masing-masing
2. Oleh itu, pihak Berkuasa Tempatan (PBT) / Kerajaan Negeri bertanggungjawab dalam memastikan perancangan keperluan pembangunan perumahan di negeri masing-masing mengikut permintaan dan penawaran di kawasan berkenaan seterusnya dapat membendung daripada berlakunya lambakan rumah baharu di negeri berkenaan.

NO SOALAN : 3

3. Manakala di bawah Kementerian Perumahan dan Kerajaan Tempatan (KPKT) pula, penguatkuasaan Akta Pemajuan Perumahan (Kawalan dan Pelesenan) 1966 [Akta 118] lebih menfokuskan untuk memastikan hanya pemaju-pemaju perumahan yang berkeelayakan dan berkemampuan sahaja melibatkan diri dalam sektor perumahan di Semenanjung Malaysia bagi menjamin kepentingan pembeli rumah.

4. Namun begitu, antara inisiatif yang dilaksanakan oleh KPKT untuk menggalakkan pembinaan Rumah Mampu Milik bagi memenuhi kehendak rakyat adalah melalui:

- (a) Penyediaan garis panduan melalui Dasar Perumahan Mampu Milik (DRMM) yang telah dilancarkan pada 11 Mei 2019. DRMM menyediakan panduan kepada kerajaan persekutuan, kerajaan negeri dan pemaju swasta dalam penyediaan rumah mampu milik yang mencukupi dan mampu dimiliki oleh rakyat; dan
- (b) Menggalakan penglibatan pemaju swasta dalam pembangunan RMM yang bertepatan dengan kehendak pasaran melalui program-program perumahan mampu milik sedia ada di bawah Kementerian ini seperti Program Perumahan Penjawat Awam (PPAM), Perumahan PR1MA dan Perumahan Syarikat Perumahan Negara Berhad (SPNB) serta program perumahan mampu milik yang dilaksanakan oleh agensi persekutuan/ negeri seperti Residensi Wilayah oleh Kementerian Wilayah Persekutuan, Rumah Mampu Milik Johor di negeri Johor dan lain-lain lagi.

5. Untuk makluman Yang Berhormat, berdasarkan Laporan Pasaran Harta Tanah, Separuh Tahun Pertama 2020 (H1 2020) oleh Pusat Maklumat Harta Tanah Negara (NAPIC), terdapat 31,661 unit siap dibina tidak terjual bernilai RM20.03 bilion, iaitu meningkat sebanyak 3.3% dalam bilangan dan 6.4% dalam nilai berbanding Separuh Tahun Kedua 2019 (H2 2019) iaitu 30,664 unit bernilai RM18.82 bilion.

6. Justeru bagi membendung lambakan rumah termasuklah rumah baharu di dalam negara, KPKT sedang melaksanakan beberapa inisiatif baharu seperti berikut:

- (a) Membangunkan *Housing Integrated Management System* (HIMS) yang akan menggantikan sistem sedia ada bagi merekod maklumat perumahan antaranya berkaitan pemajuan perumahan yang ditetapkan di bawah Akta Pemajuan Perumahan (Kawalan dan Pelesenan) 1966 [Akta 118] iaitu pengeluaran lesen, kawalan dan pemantauan projek, penguatkuasaan serta pemilikan perumahan di bawah projek perumahan swasta. Sistem ini dijangka siap pada pertengahan tahun 2021; dan
- (b) Melaksanakan Kajian Analitis Data Raya Perumahan yang bertujuan mendapatkan situasi sebenar kedudukan dan ketersediaan data berkaitan sektor perumahan di Malaysia sebelum sebarang platform berkaitan dibangunkan. Kajian ini akan mula dilaksanakan pada suku pertama 2021 dan hasil kajian ini akan dijadikan input bagi pembangunan platform pusat pengumpulan data hartanah yang meliputi permintaan dan penawaran untuk membantu Kerajaan Persekutuan dan Kerajaan Negeri membuat keputusan serta penyediaan dasar dan perancangan perumahan negara yang lebih komprehensif.

7. Dijangkakan dengan adanya platform ini kelak, pembinaan rumah baharu di dalam negara dapat dilaksanakan mengikut kehendak dan keperluan sebenar penduduk setempat, dengan mengambil kira data-data permintaan semasa dan unjuran keperluan di masa akan datang.

Sekian, terima kasih.

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 10 HINGGA NO. 54)**

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA HAJI MOHD. ANUAR
MOHD. TAHIR [TEMERLOH]**

TARIKH : 25 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan adakah Kementerian mempunyai perancangan mengkaji dan meminda Akta Parit, Jalan Dan Bangunan 1974 (Akta 133) dalam menangani masalah kekurangan tempat letak kereta dan motorsikal dan kesesakan yang wujud di kawasan-kawasan perniagaan serta perumahan bertingkat.

JAWAPAN

Tuan Yang di-Pertua,

1. Untuk makluman Yang Berhormat, buat masa ini, Kementerian Perumahan dan Kerajaan Tempatan (KPKT) tiada perancangan untuk meminda Akta Jalan, Parit dan Bangunan 1974 [Akta 133] bagi menangani masalah kekurangan tempat letak kereta dan motorsikal dan kesesakan yang wujud di kawasan-kawasan perniagaan serta perumahan bertingkat. Ini kerana tiada peruntukan dalam Akta 133 yang menyentuh mengenai tempat letak kereta dan motorsikal.

2. Walau bagaimanapun, KPKT telah mengeluarkan Garis Panduan Perancangan Tempat Letak Kenderaan di bawah Jabatan Perancangan Bandar dan Desa (PLANMalaysia) pada tahun 2018. Garis Panduan ini disediakan sebagai panduan dan rujukan kepada Pihak Berkuasa Negeri (PBN), Pihak Berkuasa Perancang Tempatan (PBPT), agensi teknikal dan pihak-pihak yang terlibat untuk merancang, mengawal dan membangunkan kawasan tempat letak kenderaan khususnya semasa penyediaan pelan pembangunan dan proses permohonan Kebenaran Merancang dari aspek perancangan tapak, jenis tempat letak kenderaan, saiz lot minimum, kemudahan sokongan dan syarat-syarat piawaian perancangan minimum kawasan tempat letak kenderaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI HAJI
ABDUL KARIM [BATANG LUPAR]**

TARIKH : 25 NOVEMBER 2020 (RABU)

SOALAN

Minta **MENTERI PENGAJIAN TINGGI** menyatakan apakah garis panduan yang digunakan dalam kaedah pembelajaran secara atas talian yang dihadapi oleh pelajar, guru dan pensyarah serta bentuk sokongan kepada pelajar dan ibu bapa bagi memastikan kaedah ini dapat diakses oleh semua.

JAWAPAN

Tuan Yang di-Pertua,

Penularan wabak pandemik COVID-19 memerlukan semua Institut Pengajian Tinggi (IPT) melaksanakan Pengajaran dan Pembelajaran (PdP) secara dalam talian dan jarak jauh (*remote learning*). PdP dalam talian bukanlah sesuatu perkara yang baharu di IPT. Perkara ini telah ditekankan melalui Lonjakan 9, Pelan Pembangunan Pendidikan Malaysia 2015 – 2025 (Pendidikan Tinggi) yang secara khusus telah memperuntukkan perkara berkaitan Pembelajaran Dalam Talian Tahap Global.

Kementerian telah memberi kuasa autonomi kepada semua IPT di dalam mengeluarkan garis panduan PdP dalam talian mengikut kesesuaian infrastruktur dan infostruktur masing-masing. Walau bagaimanapun, UA perlu merujuk segala panduan dan peraturan yang dikeluarkan oleh pihak berkuasa seperti *Malaysian Qualifications Agency* (MQA) bagi menjamin kualiti PdP dalam talian.

Kementerian juga dalam tindakan mengumpulkan garis panduan yang dihasilkan oleh semua UA untuk dijadikan sebagai panduan/amalan terbaik PdP dalam talian pada masa akan datang. Dokumen yang dikumpulkan dijangka siap pada bulan November 2020.

Bagi menyokong pelajar di dalam menjalani PdP dalam talian, Kementerian telah bekerjasama dengan pihak IPT dalam menyelaraskan empat jenis bantuan pakej pelan data dan peranti kepada pelajar. Empat (4) jenis bantuan pakej pelan data dan peranti yang disediakan Kementerian kepada pelajar adalah:

- a) Bantuan Kewangan Prihatin *One-Off* **RM50** kepada **76,153 pelajar baharu** Universiti Awam (UA) bagi sesi akademik 2020/2021 bagi tujuan langganan awal pelan data dengan peruntukan **RM3.8 juta**;
- b) Bantuan pelan data berbentuk kad sim atau sumbangan tunai kepada **320,396 pelajar UA** dari golongan B40 dengan anggaran peruntukan sebanyak **RM 24 juta**. Sebanyak 225,784 unit Kad SIM telah dan akan diagihkan kepada pelajar dengan kerjasama syarikat Yayasan YTL, Celcom dan redONE. Baki seramai 94,612 orang pelajar pula akan mendapat pemberian tunai bagi tujuan pembelian pelan data melalui dana dalaman Universiti, Tabung Kebajikan dan lain-lain;
- c) Bantuan memiliki peranti kepada **8,965 pelajar UA** dari golongan B40 (Bersasar) dengan anggaran peruntukan **13.4 juta**. Seramai 5,965 orang pelajar bakal menerima bantuan komputer riba secara percuma. Selain itu, seramai 2,700 orang pelajar pula akan menerima bantuan dalam bentuk pemberian tunai bagi tujuan yang sama manakala seramai 300 orang pelajar akan menikmati bantuan pinjaman kewangan bagi memiliki komputer riba. Bantuan ini adalah menerusi dana seperti Dana Universiti Awam, Lembaga Tabung Haji, Yayasan, Tabung Kebajikan Pelajar, Zakat dan Wakaf; dan
- d) Bantuan pakej-pakej pelan data dan peranti istimewa kepada **semua pelajar IPT** dengan kerjasama rakan strategik iaitu Celcom, Digi, TM Unifi, Maxis, Acer dan Samsung.

NO. SOALAN : 11

Selain itu, dalam memastikan pelajar mendapat akses internet, Kementerian juga telah bekerjasama dengan Suruhanjaya Komunikasi dan Multimedia Malaysia (SKMM) di dalam memberi hebahan kepada 20 UA berkenaan maklumat lokasi bagi 871 pusat internet komuniti (PIK) di bawah seliaan SKMM yang boleh diakses di kawasan bandar dan luar bandar seluruh Malaysia termasuk Sabah dan Sarawak.

KPT turut menggalakkan koordinasi sesama IPT agar Eduroam di institusi masing-masing dapat dimanfaatkan pelajar IPT di kawasan berdekatan menggunakan kemudahan dan akses internet untuk tujuan melaksanakan PdP dalam talian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : PUAN NOORITA BINTI SUAL
[TENOM]**

TARIKH : 25 NOVEMBER 2020 (RABU)

SOALAN

PUAN NOORITA BINTI SUAL [TENOM] minta **MENTERI KOMUNIKASI DAN MULTIMEDIA** menyatakan apakah langkah-langkah yang telah dan sedang diambil oleh Kementerian untuk meningkatkan tahap sistem komunikasi dan capaian internet khususnya di daerah-daerah pedalaman di Sabah.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian dengan kerjasama Suruhanjaya Komunikasi dan Multimedia Malaysia (SKMM) sentiasa memberikan tumpuan kepada penambahbaikan infrastruktur komunikasi melalui penyediaan liputan jalur lebar berkelajuan tinggi dengan menggunakan pelbagai teknologi di seluruh negara terutamanya di kawasan luar bandar termasuk di Sabah.

Di bawah pelan Jalinan Digital Negara (JENDELA) yang telah diumumkan oleh YAB Perdana Menteri pada 29 Ogos 2020 lalu, penambahbaikan infrastruktur digital yang dilaksanakan secara berfasa akan memberikan kualiti pengalaman yang sama rata antara kawasan bandar dan luar bandar.

Sasaran fasa pertama yang kini telah bermula sehingga tahun 2022 ialah :

- a. penambahan daripada 4.95 juta premis kepada 7.50 juta premis mendapat akses kepada jalur lebar talian tetap berkelajuan gigabit;
- b. perluasan liputan jalur lebar mudah alih 4G daripada 91.8% kepada 96.9% di kawasan yang berpenduduk; serta
- c. mempertingkatkan kelajuan purata jalur lebar mudah alih daripada 25Mbps kepada 35Mbps.

Di negeri Sabah, untuk meluaskan rangkaian gentian optik, sebanyak 190,115 premis akan disediakan akses kepada perkhidmatan jalur lebar talian tetap berkelajuan gigabit. Untuk perkhidmatan jalur lebar mudah alih pula, sejumlah 425 menara baharu akan dibina, manakala sebanyak 2,202 alat pemancar komunikasi sedia ada akan dinaik taraf kepada teknologi 4G.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk memudahkan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]**

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan adakah Kementerian bercadang untuk menambah jumlah peruntukan bantuan awal persekolahan kepada golongan B40 yang difahamkan hanya RM100 diberikan kepada pelajar setakat ini.

JAWAPAN

Kementerian Pendidikan Malaysia (KPM) mengambil maklum akan kadar RM100 di bawah Bantuan Awal Persekolahan pada ketika ini. KPM berpandangan kenaikan kadar tersebut sesuai dikaji semula apabila kedudukan kewangan Kerajaan semakin kukuh.

Untuk makluman Ahli Yang Berhormat, pada masa ini, Kerajaan juga telah menyediakan pelbagai jenis bantuan kepada semua murid yang layak, seperti berikut:

- i. Rancangan Makanan Tambahan (RMT);
- ii. Bantuan Pakaian Seragam (BPS);
- iii. Projek Khas Sekolah Berasrama Penuh (PKSBP);
- iv. Kumpulan Wang Amanah Pelajar Miskin (KWAPM); dan
- v. Biasiswa Kecil Persekutuan (BKP).

Dengan ini, Kementerian Pendidikan Malaysia berharap pemberian bantuan ini akan dapat meringankan beban ibu bapa, terutamanya golongan B40 bagi menampung kos perbelanjaan persekolahan anak-anak.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN SYED IBRAHIM BIN SYED NOH
[LEDANG]**

TARIKH : 25 NOVEMBER 2020 (RABU)

SOALAN

TUAN SYED IBRAHIM BIN SYED NOH [LEDANG] minta **MENTERI KOMUNIKASI DAN MULTIMEDIA** menyatakan apakah usaha pihak Kementerian bagi memastikan syarikat-syarikat telekomunikasi yang telah dikompaun di bawah Akta Komunikasi dan Multimedia 1998 mencecah sejumlah RM 4.6 juta tidak mengulangi kesilapan yang sama dan meningkatkan kualiti perkhidmatan bagi pengguna.

JAWAPAN

Tuan Yang Dipertua,

Untuk makluman Ahli Yang Berhormat, Kementerian ini melalui Suruhanjaya Komunikasi dan Multimedia Malaysia (SKMM) sentiasa memantau kualiti perkhidmatan yang diberikan oleh syarikat-syarikat telekomunikasi kepada pengguna.

Syarikat telekomunikasi perlu memastikan kualiti perkhidmatan yang dibekalkan mematuhi peruntukan yang ditetapkan dalam Akta Komunikasi dan Multimedia 1998 (AKM 1998), Standard Mandatori untuk Kualiti Perkhidmatan dan Kod Pengguna Am. Syarikat-syarikat yang tidak patuh boleh didenda di bawah Seksyen 105(3) AKM 1998 yang memperuntukkan hukuman denda maksimum sebanyak RM100,000.00 bagi setiap kesalahan.

Dalam usaha menangani isu-isu dan menambahbaik kualiti perkhidmatan yang diberikan kepada pengguna, pihak SKMM turut mengadakan perjumpaan dan perbincangan dengan Ketua Pegawai Eksekutif dari syarikat-syarikat telekomunikasi. Selain itu, pihak SKMM menerusi Forum Pengguna Komunikasi dan Multimedia Malaysia juga menyediakan platform perbincangan di antara pihak pengguna dan pemberi perkhidmatan secara sukarela.

Pihak SKMM akan terus meningkatkan usaha kawalselia dan akan bertindak tegas dengan mengeluarkan kompaun yang lebih tinggi terhadap syarikat-syarikat yang berterusan gagal mengekalkan kualiti perkhidmatan pada standard yang ditetapkan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 25 NOVEMBER 2020 (RABU)

SOALAN

TUAN AHMAD FADHLI BIN SHAARI [PASIR MAS] minta **MENTERI KEWANGAN** menyatakan adakah Kerajaan akan membantu syarikat penerbangan Malaysian Airlines melalui suntikan modal agar syarikat tersebut boleh terus beroperasi.

JAWAPAN

Tuan Yang di-Pertua,

Selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion.

Prestasi kewangan MAGB antara tahun 2015 hingga 2018 adalah seperti berikut:

Tahun	Keuntungan/ (Kerugian) - RM
2015	(1.1b)
2016	(0.7b)
2017	(1.2b)
2018	(1.3 b)

Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah. Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat diterbangkan akibat sekatan perjalanan, dan turut menyaksikan kapasiti dan pendapatannya terjejas.

Untuk makluman, Kerajaan komited untuk membantu semua pihak yang terjejas dengan penularan wabak COVID-19. Oleh itu, Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DR. ONG KIAN MING [BANGI]

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan bila pembinaan Sekolah Rendah Taman Sutera, Kajang, akan bermula memandangkan projek ini telah ditangguhkan beberapa kali akibat daripada masalah kontraktor. Adakah kontraktor baru telah dilantik.

JAWAPAN

Tuan Yang di-Pertua,

Projek Pembinaan Sekolah Kebangsaan Taman Sutera, Kajang, Selangor telah diluluskan dalam *Rolling Plan 2* (Tahun 2012) Rancangan Malaysia Ke-10 (RMKe-10). Skop projek ini meliputi pembinaan baharu 24 bilik darjah dan lain-lain kemudahan berkaitan, dengan kos projek berjumlah RM22 juta. Projek ini adalah di bawah seliaan Kementerian Pendidikan Malaysia dan sedang berada di dalam fasa pembinaan.

Tapak projek ini merupakan tapak serahan pemaju yang berkeluasan 5.88 ekar. Kontraktor projek telah dilantik pada 10 Oktober 2012 dan tarikh masuk tapak adalah pada 24 Oktober 2012. Walau bagaimanapun, pelaksanaan projek ini tidak dapat diteruskan kerana terdapat peningkatan kos berikutan pelaksanaan kerja-kerja pelarasan tanah akibat daripada pembuangan sisa binaan pemaju di tapak projek. Perubahan rekabentuk kerja-kerja tanah turut memerlukan kelulusan semula Pihak Berkuasa Tempatan (PBT) dan melibatkan peningkatan kos projek yang tinggi. Sehubungan ini, Tarikh Milik Tapak Asal telah

dipinda ke 30 Januari 2014 dan Kebenaran Merancang (KM) telah tamat pada 5 Jun 2014.

Untuk makluman Ahli Yang Berhormat, beberapa sesi perbincangan telah diadakan berkaitan isu perubahan skop tanah dan persetujuan kos tambahan yang terlibat sepanjang tahun 2015 dan 2016. Namun, pada 27 Jun 2016, kontrak bagi kontraktor yang dilantik telah ditamatkan secara bersama (*mutual termination*) disebabkan tiada persetujuan berhubung pertambahan kos projek yang terlalu tinggi dan tidak munasabah. Kemajuan terakhir kerja-kerja di tapak semasa penamatan adalah sebanyak 3%, iaitu melibatkan kerja-kerja ukur tanah.

Terkini, pihak perunding sedang dalam proses untuk memenuhi syarat untuk mendapatkan kelulusan semula Kebenaran Merancang (KM) dan Pelan Bangunan daripada pihak Majlis Perbandaran Kajang (MPKJ). Dalam masa yang sama, KPM sedang memperhalusi semula kos projek dengan mengambil kira kos pertambahan kerja-kerja tanah dan kos perubahan semasa. Kontraktor baharu dijangka akan dilantik semula pada Mac 2021 dan pembinaan sekolah ini akan mula dilaksanakan pada Jun 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : DATO' SERI SHAHIDAN BIN KASSIM [ARAU]

TARIKH : 25 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan sejauh manakah Kementerian menerusi Pihak Berkuasa Tempatan (PBT) mengambil langkah proaktif bagi mempermudah urusan permohonan lesen perniagaan kepada para peniaga tempatan terutamanya golongan belia yang menjalankan 'carboot sale', gerai-gerai, 'food truck' dan lain-lain.

JAWAPAN

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) dengan kerjasama Pihak Berkuasa Tempatan (PBT) sentiasa proaktif dalam memudahkan urusan permohonan lesen perniagaan kepada para peniaga tempatan terutamanya golongan belia yang menjalankan *carboot sale*, gerai-gerai, *food truck* dan lain-lain. Antara inisiatif yang telah dilaksanakan oleh KPKT dan PBT adalah seperti berikut:

- (a) Membangunkan Manual Pelesenan PBT pada tahun 2011 dengan kerjasama Perbadanan Produktiviti Malaysia (MPC) bagi memudahkan dan mempercepatkan tempoh pengeluaran lesen perniagaan kepada peniaga. Antara penambahbaikan yang dilaksanakan ialah:
- i. Kelulusan lesen perniagaan dalam tempoh 24 jam yang melibatkan lesen tidak berisiko seperti premis gunting rambut, kedai makan dan kedai pakaian; dan
 - ii. Kelulusan lesen dalam tempoh 2-14 hari yang melibatkan permohonan lesen perniagaan berisiko seperti lesen premis pusat hiburan, stesen minyak, bengkel kereta dan lain-lain yang perlu memenuhi syarat lesen serta sokongan agensi teknikal seperti Polis Diraja Malaysia, Jabatan Bomba dan Penyelamat Malaysia, Jabatan Kesihatan dan sebagainya;
- (b) Menyediakan Pekeliling Bilangan 3 Tahun 2008 - Pengeluaran Permit Perniagaan Kecil oleh PBT bagi mempercepat dan memudahkan proses pengeluaran lesen dan permit perniagaan kecil. Aktiviti perniagaan kecil dalam kawasan PBT boleh dikategorikan kepada beberapa jenis seperti pasar malam, pasar tani, pasar awam ataupun pasar basah, penjaja statik, penjaja bergerak dan ruang niaga kecil di pasaraya ataupun *hypermarket*;
- (c) Menyediakan Garis Panduan Pengurusan Trak Bergerak (Makanan, Barangan dan Perkhidmatan) di Pihak Berkuasa Tempatan pada tahun 2018. Garis Panduan ini sebagai rujukan pihak yang berkepentingan dalam pengurusan perniagaan trak bergerak seperti penyediaan lokasi

perniagaan, jenis perkhidmatan yang boleh ditawarkan, syarat lesen/permit perniagaan dan kadar fi;

- (d) Menyediakan Garis Panduan Pasar Malam/Pasar Harian/Pasar Tani di Kawasan PBT pada tahun 2019 bagi memudahkan pihak berkepentingan dalam merancang, mengawal dan menguruskan aktiviti pasar malam/ pasar harian/ pasar tani di Malaysia yang melibatkan elemen seperti lokasi, petak dan gerai dan pengezonan, kemudahan asas, kebersihan dan keselamatan makanan dan pengurusan tapak serta lain-lain; dan
- (e) Menyediakan kemudahan permohonan lesen secara online melalui Portal Pendaftaran dan Pelesenan Perniagaan Secara Setempat (Portal MalaysiaBIZ). Portal ini mengandungi maklumat berkaitan 1,174 aktiviti perniagaan seperti badan-badan pendaftar perniagaan, keperluan mendaftar perniagaan dan jenis perniagaan. Melalui portal MalaysiaBiz, terdapat sembilan Negeri yang melibatkan 51 PBT telah menyediakan perkhidmatan secara *online*. Contoh lesen yang boleh dimohon melalui *online* adalah seperti:
 - i. Lesen Tred, Perniagaan Dan Perindustrian;
 - ii. Lesen Penjaja;
 - iii. Lesen Pengiklanan;
 - iv. Lesen Pasar; dan
 - v. Lesen Establisymen Makanan

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

**DARIPADA : YB TUAN JUGAH ANAK MUYANG @
TAMBAT [LUBOK ANTU]**

TARIKH : 25 NOVEMBER 2020 (RABU)

SOALAN

TUAN JUGAH ANAK MUYANG @ TAMBAT [LUBOK ANTU] minta **MENTERI KOMUNIKASI DAN MULTIMEDIA** menyatakan liputan terkini sistem telekomunikasi selular di kawasan parlimen P.203 Lubok Antu merangkumi kawasan Ulu Engkari , Ulu Skrang dan Ulu Menjuau serta rancangan pihak Kementerian dan sasaran tarikh siap penambahbaikan sistem telekomunikasi selular ini.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian melalui Suruhanjaya Komunikasi dan Multimedia Malaysia (SKMM) sentiasa memberi tumpuan kepada penambahbaikan infrastruktur komunikasi selular melalui penyediaan menara komunikasi dan penaiktarafan alat pemancar komunikasi kepada perkhidmatan 4G di menara sedia ada.

Di bawah inisiatif pelan JENDELA, sebanyak 25 menara komunikasi baharu dan 37 alat pemancar komunikasi di menara sedia ada telah dirancang untuk dinaik taraf kepada perkhidmatan 4G di kawasan Parlimen Lubok Antu.

Bagi kawasan Ulu Engkari, terdapat satu (1) menara baharu sedang dirancang untuk dibina. Manakala di Ulu Skrang pula, terdapat tiga (3) alat pemancar komunikasi sedia ada akan dinaiktaraf kepada liputan 4G. Di kawasan Ulu Menjuau pula, dua (2) menara baharu dirancang untuk dibina di kawasan berkenaan. Kesemua perancangan ini akan dilaksanakan secara berperingkat bermula 2021 sehingga 2022.

Walau bagaimanapun, segala inisiatif pembangunan infrastruktur digital ini memerlukan kerjasama dari semua pihak, terutamanya di peringkat Kerajaan Negeri dan Pihak Berkuasa Tempatan (PBT) untuk pemudahcaraan proses dan kelulusan bagi projek-projek yang telah dirancang dan yang akan dilaksanakan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN NIK MOHAMAD ABDUH BIN NIK
ABDUL AZIZ [BACHOK]**

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan usaha pihak Kementerian dalam mengurangkan kerja pengkeranian para guru supaya mereka boleh memberikan fokus sebaiknya untuk sesi pengajaran dan pemudahcaraan (Pdpc) kepada pelajar.

JAWAPAN

Kementerian Pendidikan Malaysia (KPM) telah menubuhkan Jawatankuasa Mengkaji Beban Tugas Guru (JKMBTG) telah ditubuhkan pada 30 Ogos 2018. JKMBTG telah menggariskan beberapa inisiatif jangka pendek, jangka sederhana dan jangka panjang bagi menangani beban tugas guru. Ini bertujuan untuk menjadikan pengurusan di sekolah lebih efisien, ringkas dan tidak berulang. Sehingga kini, sebanyak 14 inisiatif telah diumumkan dan dilaksanakan.

Antara usaha dan inisiatif yang telah dilaksanakan bermula pada tahun 2019 bagi tujuan ini adalah seperti berikut:

- i. Memudahkan pengurusan fail dan dokumentasi
- ii. Pengurusan data & sistem online
- iii. Penyeragaman borang dan proses pemantauan
- iv. Sistem Rekod Kesihatan Murid secara dalam talian (e-RKM)

Untuk makluman Ahli Yang Berhormat, KPM juga sedang melaksanakan penambahbaikan ke atas fungsi sumber manusia di sekolah melalui senarai tugas guru - Rendah dan Menengah melalui pewujudan Modul Tadbir Urus Sekolah (MySG). MySG menjelaskan dengan lebih terperinci empat (4) komponen pengurusan sekolah iaitu Pengurusan dan Pentadbiran, Kurikulum, Hal Ehwal Murid dan Kokurikulum. Tugas-tugas yang dikenal pasti tidak relevan dengan tugas guru dan tidak mempunyai punca kuasa yang sah akan dihapuskan atau dijajarkan kepada pihak-pihak yang bersesuaian. Ini dapat memberi ruang kepada guru untuk memberikan tumpuan penuh terhadap usaha ke arah kemenjadian murid.

Selain itu, KPM juga sedang membangunkan *Single Sign On* (SSO) yang merupakan inisiatif baharu untuk memudahkan guru membuat capaian sistem melalui gerbang tunggal di portal KPM dengan hanya menggunakan satu Login ID dan Password. Inisiatif SSO ini dijangka akan siap sepenuhnya pada bulan Julai 2022.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : DATO' JOHARI BIN ABDUL (SUNGAI PETANI)

TARIKH : 25 NOVEMBER 2020 (RABU)

SOALAN

Minta **MENTERI PERTAHANAN** menyatakan adakah Kerajaan bercadang menyambung semula Program Jiwa Murni mamandangkan ATM mempunyai aset-aset yang boleh digunakan untuk membangunkan infrastruktur dan lain-lain pembangunan di kawasan yang memerlukan.

JAWAPAN

Tuan Yang di-Pertua,

Angkatan Tentera Malaysia (ATM) telah melaksanakan pelbagai Projek Jiwa Murni sama ada di Semenanjung Malaysia, Sabah dan Sarawak sejak dari dahulu lagi. Ia meliputi pembinaan infrastruktur seperti jalan raya, jambatan serta rumah kediaman. Selain itu, Projek Jiwa Murni yang merangkumi perkhidmatan kesihatan dan pergigian serta pendidikan juga dilaksanakan khususnya kepada rakyat di kawasan pedalaman.

ATM sentiasa bersedia untuk bekerjasama dengan agensi-agensi kerajaan yang lain bagi melaksanakan projek-projek pembangunan infrastruktur dan lain-lain bantuan terutamanya di kawasan pedalaman dalam konteks Projek Jiwa Murni. Bagi program-program bersifat kemasyarakatan pula, ia masih terus dilaksanakan sehingga sekarang.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN TONY PUA KIAM WEE [DAMANSARA]

TARIKH : 25 NOVEMBER 2020 (RABU)

SOALAN

TUAN TONY PUA KIAM WEE [DAMANSARA] minta **MENTERI KEWANGAN** menyatakan kelebihan yang akan dinikmati oleh anak syarikat Khazanah Nasional, UEM Sunrise apabila digabungkan dengan syarikat EcoWorld, yang menanggung hutang yang hampir RM3 bilion. Adakah Khazanah akan memberikan pelaburan tambahan ke dalam syarikat UEM Sunrise – EcoWorld.

JAWAPAN

Tuan Yang di-Pertua,

Cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.

Cadangan tersebut telah dikemukakan berdasarkan kepada manfaat komersil yang mampu diraih hasil daripada penggabungan tersebut. Cadangan penggabungan tersebut tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.

Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.

Sebarang keputusan yang berkaitan dengan cadangan penggabungan ini adalah bersifat komersil dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG CHEN [SUBANG]

TARIKH : 25 NOVEMBER 2020 (RABU)

SOALAN

TUAN WONG CHEN [SUBANG] minta **MENTERI KEWANGAN** menyatakan adakah pihak Kerajaan akan mempertimbangkan semula pelaksanaan moratorium pinjaman yang disasarkan kepada peminjam yang berpendapatan kurang daripada RM2,500 sebulan, pinjaman di bawah RM50,000 dan peminjam sektor yang terlibat secara langsung dalam industri pelancongan.

JAWAPAN

Tuan Yang di-Pertua,

1. Kerajaan telah memberikan moratorium ke atas pinjaman bank selama 6 bulan sebagai sebahagian langkah Pakej Rangsangan Ekonomi Prihatin Rakyat (atau PRIHATIN) untuk membantu meringankan beban rakyat dan perniagaan. Bantuan akan terus diberikan meskipun selepas moratorium secara keseluruhan berakhir tetapi secara yang lebih tersasar bagi memastikan hanya peminjam yang benar-benar memerlukannya akan diberi bantuan.
2. Dengan peralihan kepada bantuan bayaran balik pinjaman secara bersasar mulai 1 Oktober 2020, bank terus menawarkan pelanjutan moratorium dan bentuk fleksibiliti bayaran balik pinjaman lain kepada peminjam yang terjejas akibat COVID-19. Bantuan ini disediakan kepada peminjam yang telah kehilangan pekerjaan atau pendapatan mereka terjejas, sama ada secara individu, isi rumah atau sektor PKS sepanjang tahun 2020 sehingga tahun 2021.
3. Selain itu, berikutan gelombang ketiga COVID-19 baru-baru ini, seperti yang diumumkan dalam Belanjawan 2021, bantuan bayaran balik pinjaman bersasar akan dilanjutkan kepada golongan B40 yang merupakan penerima Bantuan Prihatin Rakyat dan perusahaan mikro dengan pinjaman berjumlah sehingga RM150,000.
4. Peminjam dari golongan B40 diberi pilihan sama ada menangguhkan bayaran balik pinjaman selama tiga bulan atau mengurangkan bayaran ansuran bulanan mereka sebanyak 50% dalam enam bulan mulai Disember 2020. Kelulusan diberikan secara automatik setelah mereka menyatakan pilihan mereka kepada bank. Peminjam yang memerlukan bantuan hanya perlu memaklumkan bank masing-masing melalui pelbagai saluran mudah yang telah disediakan seperti perbankan internet, secara dalam talian atau menerusi Agensi Kaunseling dan Pengurusan Kredit (AKPK).

5. Proses permohonan telah dipermudah dan diringkaskan bagi memastikan bantuan dapat diberikan dengan segera kepada peminjam yang memerlukan. Bagi penerima Bantuan Prihatin Nasional kumpulan M40 yang memohon pengurangan ansuran mereka, bank telah bersetuju untuk menerima pengisytiharan sendiri pengurangan pendapatan yang dialami akibat pandemik COVID-19.

Tuan Yang di-Pertua,

6. Setakat ini, dalam kalangan individu yang memohon bantuan bayaran balik pinjaman, kira-kira 50% mempunyai pendapatan bulanan sebanyak RM5,000 atau kurang. Sementara itu, sebanyak 28% daripada mereka pula mempunyai pendapatan bulanan antara RM5,000 hingga RM10,000. Bagi peminjam yang berada dalam industri terjejas seperti industri pelancongan, bank juga menawarkan penangguhan bayaran balik pinjaman sehingga enam bulan dengan mengambil kira faktor penutupan sempadan antarabangsa yang berpanjangan. Tempoh penangguhan ini boleh ditambah sekiranya keadaan semasa tidak berubah. Kerajaan juga ingin menekankan bahawa bantuan bayaran balik pinjaman terus disediakan kepada mereka yang terjejas. Mereka hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : TUAN LUKANISMAN BIN AWANG SAUNI
[SIBUTI]**

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan apakah status cadangan membina blok bangunan tambahan 3 tingkat kediaman staf akademik dan staf bukan akademik di IPG Kampus Sarawak Miri yang telah disenaraikan dalam Rancangan Malaysia ke-11 Rolling Plan 3.

JAWAPAN

Tuan Yang Di Pertua,

Untuk makluman Ahli yang Berhormat, projek pembinaan blok bangunan tambahan 3 tingkat kediaman staf akademik dan staf bukan akademik di Institut Pendidikan Guru (IPG), Kampus Sarawak, Miri telah diluluskan dibawah Rancangan Malaysia Ke-11 (RMKe-11) dengan kos berjumlah RM7 juta.

Berdasarkan kepada keperluan semasa dan selaras dengan pendekatan "*design to cost*", skop asal projek pembinaan blok bangunan tambahan 3 tingkat kediaman (16 unit) ini telah dipinda kepada pembinaan 5 blok kuarters kelas F berkembar (10 unit). Agensi pelaksana bagi projek adalah Jabatan Kerja Raya Negeri Sarawak. Untuk makluman Ahli Yang Berhormat, projek ini telah diiklankan pada 26 September 2020 dan tarikh tutup iklan tender pada 19 Oktober 2020. Surat Setuju Terima dijangka akan dikeluarkan pada Januari 2021 dan tempoh pelaksanaan projek ini adalah selama 18 bulan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN WONG HON WAI [BUKIT BENDERA]

TARIKH : 25 NOVEMBER 2020 (RABU)

SOALAN

TUAN WONG HON WAI [BUKIT BENDERA] minta **MENTERI KEWANGAN** menyatakan berapa jumlah pegangan dalam ringgit Malaysia dan dalam peratusan Bank Negara Malaysia dalam '*Malaysia Government Securities*' (MGS) serta Bond Prihatin dan sama ada satu '*Quantitative Easing*' (QE) dilaksanakan untuk membiayai krisis pandemik covid-19.

JAWAPAN

Tuan Yang di-Pertua,

1. Sehingga akhir-September 2020, jumlah hutang Kerajaan Persekutuan merangkumi instrumen Sekuriti Kerajaan Malaysia (MGS) (RM436.6 bilion), Terbitan Pelaburan Kerajaan (MGII) (RM359.6 bilion), bill Perbendaharaan (RM24 bilion), Sukuk Prihatin (RM0.7 bilion) dan Sukuk Perumahan Kerajaan (RM24.1 bilion). Manakala baki RM29.3 bilion pula merangkumi pinjaman luar pesisir.

2. Setakat 30 September 2020, pegangan bon kerajaan Malaysia oleh Bank Negara Malaysia (BNM) adalah sebanyak RM10.9 bilion atau 1.3% daripada jumlah keseluruhan terbitan kerajaan. Ini merupakan salah satu instrumen monetari yang digunakan untuk mengurus tahap kecairan pasaran tempatan dan volatiliti pasaran bon tempatan. Walau bagaimanapun, BNM tiada pegangan dalam Sukuk Prihatin yang diterbitkan khas untuk pelabur runcit dan firma korporat pada September 2020.

Tuan Yang di-Pertua,

3. Berdasarkan keputusan Jawatankuasa Dasar Monetari (MPC) BNM, dasar '*Quantitative Easing*' (QE) tidak dilaksanakan di Malaysia. Buat masa ini, pembelian bon kerajaan Malaysia oleh BNM adalah untuk memastikan pasaran bon domestik berada dalam keadaan yang teratur dengan tahap kecairan yang mencukupi. Sepanjang tempoh krisis COVID-19, sebanyak RM9.2 bilion bon kerajaan Malaysia telah dibeli oleh BNM melalui operasi pasaran terbuka.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI MAHDZIR BIN KHALID
[PADANG TERAP]**

TARIKH : 25 NOVEMBER 2020 (RABU)

SOALAN

Minta **MENTERI PENGAJIAN TINGGI** menyatakan apakah faktor yang mengakibatkan berlakunya kelewatan di dalam memaklumkan kepada pelajar berkaitan penangguhan proses pendaftaran dan orientasi bagi pelajar universiti awam baru dan apakah mekanisme Kementerian bagi membantu pelajar yang terkandas dan memerlukan bagi meneruskan kemasukan untuk sesi pendaftaran yang akan diumumkan kelak memandangkan ada di antara mereka merupakan pelajar yang kurang berkemampuan.

JAWAPAN

Tuan Yang di-Pertua,

Kementerian telah memutuskan agar sesi pendaftaran dan kemasukan pelajar baharu atau sedia ada secara bersemuka ke kampus yang dirancang pelaksanaannya pada bulan Oktober 2020, ditangguhkan. Keputusan ini dibuat berikutan berlakunya peningkatan bilangan kes penularan pandemik COVID-19 secara mendadak di dalam negara. Ia juga selaras dengan arahan pelaksanaan Perintah Kawalan Pergerakan Bersyarat (PKPB) yang dikuatkuasakan oleh Kerajaan atas nasihat Majlis Keselamatan Negara (MKN) dan Kementerian Kesihatan Malaysia (KKM).

Kementerian juga turut memantau secara rapat perkembangan semasa pandemik COVID-19 di dalam negara bagi memastikan sebarang keputusan yang dibuat dapat menjamin keselamatan dan menjaga kebajikan pelajar.

Sebagai inisiatif berterusan untuk memastikan maklumat yang tepat dapat disalurkan, Bilik Gerakan di kementerian dan talian *hotline* di universiti-universiti awam terus dibuka bagi menjawab sebarang pertanyaan daripada pelajar, ibubapa, warga IPT, atau masyarakat umum.

Selain itu, kementerian turut bekerjasama dengan syarikat penerbangan dan pengangkutan darat seperti Malaysia Airlines, AirAsia, Malindo Air dan FireFly serta pihak Keretapi Tanah Melayu Berhad (KTMB) bagi menawarkan penjadualan semula pergerakan pelajar tanpa dikenakan sebarang implikasi kos tambahan. Pihak pengurusan universiti awam juga menyediakan insentif kewangan; pemberian pelan data dan peranti secara percuma atau pada harga tawaran istimewa; elaun sara hidup; dan bantuan makanan kepada pelajar berkeperluan.

Kementerian juga peka terhadap isu rumah sewa yang sering dihadapi oleh pelajar. Atas dasar keprihatinan mendalam terhadap permasalahan ini, maka Kementerian dengan kerjasama Majlis Perumahan Universiti Malaysia (MAPUM) telah mengolah langkah bagi membangunkan garis panduan pengurusan rumah sewa siswa untuk digunapakai di peringkat IPT. Kementerian turut mencadangkan kepada pihak universiti awam agar satu unit/seksyen khusus diwujudkan bagi mengendalikan urusan dan kebajikan pelajar *non-resident* atau pelajar luar kampus. Lanjutan daripada ini, Kementerian dengan kerjasama MAPUM, universiti awam dan Unit Pemodenan Tadbiran dan Perancangan Pengurusan Malaysia (MAMPU) sedang membangunkan satu portal pengurusan rumah sewa siswa yang dilihat menjadi satu platform bersepadu bagi pengurusan hal ehwal berkaitan rumah sewa atau kemudahan penginapan luar kampus bagi pelajar.

Atas dasar keprihatinan, bagi pengajian semester 2 sesi 2019/2020, Kerajaan telah bersetuju untuk mengurangkan kadar yuran asrama dan

perkhidmatan atau aktiviti UA sehingga 15 peratus. Ini melibatkan peruntukan sebanyak RM72 juta. Bagi pengajian semester 1 Sesi 2020/2021 pula, Kerajaan juga bersetuju untuk mengurangkan yuran asrama dan perkhidmatan pada kadar minimum 10 peratus.

Kementerian amat mengalu-alukan segala sumbangan dan peranan oleh pihak luar termasuk NGO; agensi; syarikat; atau individu untuk tampil sama-sama berganding bahu menghulurkan bantuan kepada pelajar di universiti awam. Atas prinsip ini, Kementerian dengan kerjasama Yayasan Sukarelawan Siswa (YSS) juga telah melancarkan inisiatif dengan izin *crowdfunding* melalui Tabung Prihatin Siswa. Inisiatif ini mengajak pihak luar untuk turut sama menyalurkan sumbangan bagi membantu meringankan kesulitan pelajar yang berkeperluan dalam meneruskan sesi PdP mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 25 NOVEMBER 2020 (RABU)

SOALAN

TUAN MUHAMMAD BAKHTIAR BIN WAN CHIK [BALIK PULAU] minta **MENTERI KEWANGAN** menyatakan apakah rasional dan tujuan pergabungan syarikat pemaju hartanah Eco World dan UEM anak syarikat Khazanah dimana kita maklum bahawa Eco World mempunyai tanggungan hutang yang tinggi yang akan menjadi liabiliti kepada Khazanah. Adakah ini satu “*bail-out*” yang jelas untuk menyelamatkan kroni.

JAWAPAN

Tuan Yang di-Pertua,

Cadangan untuk menggabungkan UEM Sunrise Berhad (UEM Sunrise) dan EcoWorld Development Group Berhad (EcoWorld) telah diutarakan oleh UEM Group Berhad (UEM Group), sebuah syarikat milik penuh Khazanah Nasional Berhad, untuk pertimbangan lembaga pengarah kedua-dua buah syarikat hartanah tersebut.

Cadangan tersebut telah dikemukakan berdasarkan kepada manfaat komersil yang mampu diraih hasil daripada penggabungan tersebut. Cadangan penggabungan tersebut tidak melibatkan tunai tetapi transaksi pertukaran saham dan waran yang mampu mengukuhkan lagi kedudukan UEM Sunrise.

Cadangan penggabungan ini masih di peringkat awal perbincangan dan tertakluk kepada pelaksanaan kajian terperinci (*due diligence*) serta persetujuan semua pemegang saham UEM Sunrise dan EcoWorld, sekiranya kedua-dua syarikat ini bersetuju untuk memulakan perbincangan penggabungan selanjutnya.

Sebarang keputusan yang berkaitan dengan cadangan penggabungan ini adalah bersifat komersil dan menjadi tanggungjawab syarikat-syarikat yang terlibat untuk memastikan penggabungan ini menghasilkan sinergi yang terbaik dengan mengambil kira kepentingan pemegang saham syarikat masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ZAKARIA BIN MOHD. EDRIS @
TUBAU [LIBARAN]**

TARIKH : 25 NOVEMBER 2020 (RABU)

SOALAN

Minta **MENTERI PENGAJIAN TINGGI** menyatakan apakah bantuan yang akan dihulurkan oleh Kementerian kepada pelajar serta keluarga yang terjejas akibat keputusan drastik penangguhan kemasukan pelajar IPT demi kekang penularan wabak COVID-19.

JAWAPAN

Tuan Yang di-Pertua,

Kementerian telah bekerjasama dengan syarikat penerbangan dan pengangkutan darat seperti Malaysia Airlines, AirAsia, Malindo Air dan FireFly serta pihak Keretapi Tanah Melayu Berhad (KTMB) bagi menawarkan penjadualan semula pergerakan pelajar tanpa dikenakan sebarang implikasi kos tambahan. Pihak pengurusan universiti awam juga menyediakan insentif kewangan; pemberian pelan data dan peranti secara percuma atau pada harga tawaran istimewa; elaun sara hidup; dan bantuan makanan kepada pelajar berkeperluan.

Kementerian juga peka terhadap isu rumah sewa yang sering dihadapi oleh pelajar. Atas dasar keprihatinan mendalam terhadap permasalahan ini, maka Kementerian dengan kerjasama Majlis Perumahan Universiti Malaysia (MAPUM) telah mengolah langkah bagi membangunkan garis panduan pengurusan rumah sewa siswa untuk digunapakai di peringkat IPT. Kementerian turut mencadangkan kepada

pihak universiti awam agar satu unit/seksyen khusus diwujudkan bagi mengendalikan urusan dan kebajikan pelajar *non-resident* atau pelajar luar kampus. Lanjutan daripada ini, Kementerian dengan kerjasama MAPUM, universiti awam dan Unit Pemodenan Tadbiran dan Perancangan Pengurusan Malaysia (MAMPU) sedang membangunkan satu portal pengurusan rumah sewa siswa yang dilihat menjadi satu platform bersepadu bagi pengurusan hal ehwal berkaitan rumah sewa atau kemudahan penginapan luar kampus bagi pelajar.

Atas dasar keprihatinan, bagi pengajian semester 2 sesi 2019/2020, Kerajaan telah bersetuju untuk mengurangkan kadar yuran asrama dan perkhidmatan atau aktiviti UA sehingga 15 peratus. Ini melibatkan peruntukan sebanyak RM72 juta. Bagi pengajian semester 1 Sesi 2020/2021 pula, Kerajaan juga bersetuju untuk mengurangkan yuran asrama dan perkhidmatan pada kadar minimum 10 peratus.

Kementerian amat mengalu-alukan segala sumbangan dan peranan oleh pihak luar termasuk NGO; agensi; syarikat; atau individu untuk tampil sama-sama berganding bahu menghulurkan bantuan kepada pelajar di universiti awam. Atas prinsip ini, Kementerian dengan kerjasama Yayasan Sukarelawan Siswa (YSS) juga telah melancarkan inisiatif dengan izin *crowdfunding* melalui Tabung Prihatin Siswa. Inisiatif ini mengajak pihak luar untuk turut sama menyalurkan sumbangan bagi membantu meringankan kesulitan pelajar yang berkeperluan dalam meneruskan sesi PdP mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN LOKE SIEW FOOK [SEREMBAN]

TARIKH : 25 NOVEMBER 2020 (RABU)

SOALAN

TUAN LOKE SIEW FOOK [SEREMBAN] minta **MENTERI KEWANGAN** menyatakan apakah bentuk bantuan yang telah disalurkan kepada syarikat-syarikat penerbangan negara yang menghadapi cabaran yang besar akibat wabak COVID-19.

JAWAPAN

Tuan Yang di-Pertua,

Penularan wabak Covid-19 yang telah diisytiharkan sebagai pandemik oleh Pertubuhan Kesihatan Sedunia (*World Health Organisation* - WHO) pada 11 Mac 2020 bukan sahaja telah menyebabkan krisis kesihatan dan sosial malah krisis ekonomi di kebanyakan negara di dunia. Sebagai sebuah negara perdagangan kecil yang mengamalkan sistem ekonomi terbuka, Malaysia turut menerima kesan buruk akibat pandemik ini. Kesan ekonomi yang dialami ini bersifat menyeluruh dan dirasakan oleh semua sektor dalam negara termasuklah sektor penerbangan yang disebabkan oleh penutupan sempadan dan pelaksanaan perintah kawalan pergerakan bagi menangani penularan wabak COVID-19 tersebut.

Untuk makluman Ahli Dewan, Kerajaan komited membantu semua pihak yang terjejas dengan penularan wabak COVID-19 ini. Walau

bagaimanapun, pada masa ini Kerajaan tidak terlibat dalam pelan menyelamatkan mana-mana syarikat termasuk syarikat penerbangan komersial memandangkan Kerajaan perlu memastikan apa-apa bantuan yang diberikan terutamanya daripada segi kewangan mempunyai kerangka kerja dan objektif yang jelas untuk mengelakkan daripada berlakunya diskriminasi kepada syarikat lain yang turut terjejas dengan wabak ini. Selain itu, bantuan kewangan kepada mana-mana syarikat akan dianggap sebagai *bail-out* dan secara tidak langsung akan menjejaskan lagi prestasi syarikat-syarikat pesaing lain yang tidak menerima bantuan kewangan daripada Kerajaan. Tambahan pula, Kerajaan tidak mempunyai sebarang pegangan saham dalam mana-mana syarikat penerbangan tersebut. Justeru itu, sebarang cadangan pemulihan kewangan syarikat adalah tertakluk kepada pertimbangan dan kelulusan Lembaga Pengarah dan pemegang saham syarikat masing-masing.

Tuan Yang di-Pertua,

Mengambil kira kesan krisis ekonomi semasa yang menyeluruh, Kerajaan berpandangan pemberian bantuan wajar dilaksanakan secara meluas dan tidak terhad kepada syarikat penerbangan sahaja. Bantuan ini telah dilaksanakan oleh Kerajaan melalui beberapa pakej rangsangan dan pelan pemulihan ekonomi seperti PRIHATIN, PRIHATIN PKS+, PENJANA dan KITA PRIHATIN yang keseluruhannya bernilai RM305 bilion bagi membantu pekerja dan rakyat yang terjejas pendapatan serta perniagaan yang mengalami masalah aliran tunai termasuk syarikat penerbangan tempatan. Antara langkah yang telah dilaksanakan seperti yang diumumkan sebelum ini antaranya termasuklah moratorium bayaran balik pinjaman perniagaan dan pinjaman isi rumah, Bantuan Prihatin Nasional, program subsidi upah, skim pengeluaran i-Lestari, skim jaminan pembiayaan perniagaan, skim kredit mikro, dana pembiayaan PKS dan banyak lagi.

Bank Negara Malaysia (BNM) juga telah menurunkan Kadar Dasar Semalaman (OPR) dan Keperluan Rizab Berkanun (SRR) bagi meningkatkan mudah tunai untuk menyokong aktiviti pengantaraan

kewangan. BNM turut menyatakan ketersediaan bantuan bayaran balik pinjaman bersasar kepada peminjam yang terjejas berikutan COVID-19. Kemudahan ini boleh dipohon terus kepada institusi kewangan komersial berkaitan merangkumi pelanjutan moratorium dan pengurangan bayaran ansuran.

Kerajaan juga melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan modal kerja syarikat. Kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

Kerajaan juga melalui Belanjawan 2021 akan menyediakan program latihan dan penempatan semula bagi 8,000 kakitangan dari syarikat penerbangan di Malaysia dengan peruntukan sebanyak 50 juta ringgit. Inisiatif khusus ini adalah sebagai tambahan kepada bantuan yang telah dilaksanakan sebelum ini, serta inisiatif-inisiatif lain yang diumumkan dalam Belanjawan 2021 bagi membantu pekerja dan rakyat yang terjejas pendapatan termasuklah kakitangan syarikat penerbangan.

Sekian, terima kasih.

**PEMBERITAHUAN PERTANYAAN
DEWAN RAKYAT MALAYSIA
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN RAMLI BIN DATO' MOHD NOR
[CAMERON HIGHLANDS]**

TARIKH : 25 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan apakah perancangan daripada pihak Kementerian untuk menaik taraf jalan raya di kawasan pedalaman Orang Asli dari Pos Baung, Sungai Siput sehingga ke jajaran Pos RPS Kemar, Perak.

JAWAPAN:

Tuan Yang di-Pertua,

Dalam tempoh 5 tahun RMKe-12, JAKOA telah mengemukakan permohonan projek pembinaan jalan di perkampungan Orang Asli kepada EPU sepanjang 150km. Dari jumlah tersebut, sepanjang 77km jalan baru akan dibina di negeri Perak.

JAKOA telah mengenalpasti keperluan pembinaan jalan baru sepanjang 60km di Parlimen Sungai Siput melibatkan 27 kampung Orang Asli (KOA). Projek pembinaan jalan tersebut dijangka bermula di Kampung Bawong ke Pos Poi (7 KOA), Pos Piah (4 KOA), KOA Gentes dan berakhir di RPS Kemar yang menjadi pusat pentadbiran kepada 15 KOA.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN SIM CHEE KEONG [BUKIT MERTAJAM]

TARIKH : 25 NOVEMBER 2020 (RABU)

SOALAN

TUAN SIM CHEE KEONG [BUKIT MERTAJAM] minta **MENTERI KEWANGAN** menyatakan jumlah pemohon lanjutan moratorium, jumlah permohonan yang dilulus, pecahan status pekerjaan pemohon yang diluluskan, serta bagi yang tidak diluluskan, berikan sebab-sebabnya.

JAWAPAN

Tuan Yang di-Pertua,

1. Setakat 16 Oktober 2020, sekitar 650,000 permohonan untuk bantuan bayaran balik pinjaman telah diterima dengan kadar kelulusan sebanyak 98%. Daripada permohonan yang diluluskan:

- a. sejumlah 40% telah memohon pelanjutan moratorium merangkumi individu yang baru sahaja kehilangan pekerjaan serta perniagaan dalam sektor yang mungkin masih mengalami kekangan operasi yang ketara akibat pandemik COVID-19; dan
- b. sejumlah 60% telah memilih pengurangan bayaran ansuran bulanan merangkumi peminjam yang pendapatannya telah berkurang.

2. Manakala kes permohonan yang tidak diluluskan adalah kecil sebanyak 2% dan sebab utama permohonan ditolak oleh bank ialah:

- a. Peminjam individu masih mempunyai pekerjaan dengan pendapatan yang stabil, serta isi rumah termasuk pasangan masing-masing yang tidak mengalami pengurangan pendapatan; dan
- b. Peminjam PKS yang memang menghadapi kesukaran kewangan walaupun sebelum penularan wabak COVID-19. Bagi peminjam seperti ini, pelanjutan moratorium bukan satu penyelesaian yang mampan dan bank telah merujuk mereka kepada AKPK untuk mendapatkan bantuan bagi menyelesaikan masalah hutang mereka. AKPK telah menubuhkan “Meja Bantuan Perusahaan Mikro” bagi menawarkan khidmat nasihat kewangan secara percuma dan membantu perusahaan mikro mendapatkan bantuan bayaran balik pinjaman. Terdapat juga sebilangan kes PKS yang sedang melalui prosiding muflis atau pembubaran, atau telah

didaftarkan di bawah Program Pengurusan Hutang anjuran AKPK. Bagi peminjam yang berdaftar di bawah Program Pengurusan Hutang oleh AKPK, mereka boleh berhubung dengan AKPK untuk memohon semakan semula bayaran balik pinjaman yang mencerminkan keadaan kewangan semasa mereka.

Tuan Yang di-Pertua,

3. Proses permohonan telah dipermudah dan diringkaskan bagi memastikan bantuan dapat diberikan dengan segera kepada mereka yang memerlukannya. Dalam kebanyakan keadaan, bank hanya menghendaki peminjam untuk mengemukakan penyata bank terkini atau mengisytiharkan bahawa pendapatan mereka telah terjejas akibat pelaksanaan sekatan pergerakan. Bagi penerima Bantuan Prihatin Nasional kumpulan M40 yang memohon pengurangan ansuran mereka, bank juga telah bersetuju untuk menerima pengisytiharan sendiri pengurangan pendapatan yang dialami akibat pandemik COVID-19.

4. Dengan bank terus meluluskan hampir kesemua permohonan bantuan bayaran balik pinjaman, Kerajaan ingin menekankan bahawa bantuan bayaran balik pinjaman akan disediakan kepada mereka yang terjejas. Mereka hanya perlu menghubungi bank masing-masing.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan jumlah kanak-kanak tanpa kerakyatan (*stateless*) yang sedang belajar di sekolah kebangsaan pada tahun 2020 serta rancangan Kementerian untuk meminda dasar ini sekiranya ada.

JAWAPAN

Tuan Yang di-Pertua,

Kemasukan kanak-kanak ke sekolah kendalian Kementerian Pendidikan Malaysia (KPM) adalah berdasarkan peruntukan di bawah Peraturan-Peraturan Pendidikan (Penerimaan Masuk Murid Ke Sekolah, Penyimpanan Daftar dan Syarat Bagi Pengekalan Murid Belajar Di Sekolah) 1998, Akta Pendidikan 1996.

Untuk makluman Ahli Yang Berhormat, kanak-kanak bukan warganegara dan kanak-kanak yang belum ditentukan kewarganegaraannya serta tidak memenuhi syarat kemasukan ke sekolah seperti yang diperuntukkan dalam Peraturan-Peraturan ini, tidak diterima untuk bersekolah di sekolah di bawah pentadbiran KPM. Sehubungan dengan itu, KPM tidak mempunyai sebarang data dan maklumat mengenai kanak-kanak tanpa kerakyatan yang belajar di sekolah kebangsaan. Walau bagaimanapun, kanak-kanak tanpa kerakyatan boleh mendapatkan pendidikan di sekolah swasta dan pusat bimbingan alternatif. Sekian, terima kasih.

**PEMBERITAHUAN PERTANYAAN
DEWAN RAKYAT MALAYSIA
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN ABDUL LATIFF BIN ABDUL RAHMAN
[KUALA KRAI]**

TARIKH : 25 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan jumlah sebenar peruntukan subsidi skim tanaman semula getah dan statistik bilangan pekebun kecil yang berjaya mendapat kelulusan skim tersebut dalam tempoh RMK-11.

JAWAPAN

Tuan Yang di-Pertua,

Tanam Semula Getah Ke Getah adalah satu program untuk menggantikan pokok getah tua yang tidak ekonomik dengan pokok getah klon baru yang berhasil tinggi. Kadar ini meliputi bekalan bahan input pertanian serta bantuan kewangan.

Sepanjang RMKe-11 (2016 – 2020) sejumlah RM759.4 juta telah diperuntukkan bagi program berkenaan. Dengan keseluruhan peruntukkan tersebut, bilangan pekebun kecil yang berjaya diberi kelulusan adalah seramai 68,160 orang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 25 NOVEMBER 2020 (RABU)

SOALAN

TUAN NGA KOR MING [TELUK INTAN] minta **MENTERI KEWANGAN** menyatakan secara terperinci jumlah hutang Kerajaan termasuk Syarikat-syarikat GLC setakat Oktober 2020 dan apakah langkah Kerajaan untuk membayar hutang tersebut.

JAWAPAN

Tuan Yang di-Pertua,

1. Berdasarkan pengiraan had statutori, nisbah hutang Kerajaan Persekutuan yang merangkumi instrumen Sekuriti Kerajaan Malaysia (MGS), Terbitan Pelaburan Kerajaan Malaysia (MGII) dan Bil Perbendaharaan Islam Malaysia (MITB) mencatat 56.6% daripada KDNK. Di samping itu, Kerajaan juga menanggung komitmen lain termasuk komitmen jaminan yang berjumlah RM177 bilion bagi tanggungan hutang syarikat berkaitan Kerajaan untuk pelaksanaan pelbagai projek infrastruktur dan utiliti awam, hutang syarikat 1Malaysia Development Berhad (1MDB) berjumlah hampir RM32 bilion serta liabiliti kewangan lain yang dianggarkan berjumlah RM173.3 bilion meliputi projek kerjasama awam swasta (PPP) dan projek yang dilaksanakan secara *off-budget* sebelum ini di bawah inisiatif pembiayaan swasta (PFI) dan PBLT Sendirian Berhad.

Dengan mengambil kira kesemua tanggungan ini, secara keseluruhannya pendedahan hutang dan liabiliti Kerajaan dianggarkan berjumlah RM1,257 bilion atau 87.3% daripada KDNK pada akhir September 2020.

2. Secara umumnya, Kerajaan bertanggungjawab untuk memastikan pembiayaan semula hutang Kerajaan Persekutuan dilaksanakan secara teratur mengikut jadual. Dalam situasi krisis pandemik COVID-19 yang masih berlarutan ini, Kerajaan akan memberi tumpuan terhadap pemulihan ekonomi terutamanya menyokong aktiviti perniagaan dan memelihara kesejahteraan rakyat. Setelah ekonomi kembali pulih, Kerajaan akan kembali melaksanakan langkah konsolidasi fiskal dan inisiatif pengukuhan kedudukan fiskal kerajaan dalam usaha memastikan paras pendedahan hutang dan liabiliti kewangan Kerajaan Persekutuan kekal terkawal dan terurus. Langkah tersebut termasuk meluaskan asas hasil, mengukuhkan pentadbiran dan pematuhan cukai serta peningkatan kecekapan perbelanjaan bagi mengawal paras defisit fiskal Kerajaan. Oleh yang demikian, keperluan pinjaman Kerajaan akan dapat dikurangkan dan seterusnya ini akan dapat mengawal pendedahan hutang dan liabiliti kewangan Kerajaan Persekutuan.

Tuan Yang di-Pertua,

3. Berkenaan tanggungan hutang syarikat GLC, kesemua GLC adalah bertanggungjawab untuk memenuhi obligasi kewangan mereka. Manakala bagi syarikat 1MDB, obligasi ini ditanggung oleh Kerajaan Persekutuan. Kerajaan sedang meneruskan usaha untuk mendapatkan kembali aset syarikat 1MDB. Sehingga 30 September 2020, baki Akaun Amanah Mendapatkan Kembali Aset 1MDB adalah berjumlah **RM11.7 bilion** dan kesemuanya akan digunakan untuk membayar balik komitmen kewangan 1MDB.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN
DARIPADA : DATUK MOHAMAD BIN ALAMIN [KIMANIS]
TARIKH : 25 NOVEMBER 2020 (RABU)

SOALAN

Minta **MENTERI PENGAJIAN TINGGI** menyatakan adakah Kementerian bercadang untuk mengembalikan kemudahan diskaun seperti sebelum ini untuk pembayaran balik pinjaman PTPTN bagi membantu mengurangkan bebanan kewangan mahasiswa.

JAWAPAN

Tuan Yang di-Pertua,

Kementerian amat prihatin terhadap bebanan peminjam PTPTN untuk membuat bayaran balik pinjaman mereka semasa pandemik COVID-19 ketika ini. Justeru, bagi membantu meringankan beban mereka, beberapa inisiatif telah diperkenalkan antaranya:

- a. Penganjuran '*Virtual Mini Job Hunt for PTPTN Borrowers*' secara dalam talian dengan kerjasama PERKESO bagi membantu peminjam mendapatkan peluang pekerjaan, seterusnya berupaya membuat bayaran balik pinjaman mereka;
- b. Membantu mengurangkan bebanan atau komitmen bayaran balik pinjaman dengan sentiasa terbuka untuk membuat rundingan bagi:
 - i. menstrukturkan semula bayaran balik pinjaman sehingga umur 60 tahun; dan
 - ii. menangguhkan bayaran balik pinjaman sehingga maksimum 24 bulan.

Selain itu, Kerajaan turut bersetuju untuk memberikan moratorium kepada peminjam PTPTN bagi tempoh enam (6) bulan mulai Mac hingga Disember 2020. Inisiatif memberikan manfaat kepada 1.5 juta peminjam dengan jumlah bayaran balik yang ditangguhkan adalah sebanyak RM1.125 billion.

Sebarang cadangan untuk memperkenalkan semula pemberian diskaun bayaran balik pinjaman memerlukan kajian lanjut yang terperinci mengenai implikasi kewangan kepada Kerajaan, khususnya PTPTN.

Kerajaan yang bertanggungjawab serta prihatin akan sentiasa memastikan kebajikan serta permasalahan rakyat ditangani dengan sebaiknya, dan pada masa yang sama perlu melindungi sumber yang ada agar sentiasa dalam keseimbangan dan kekal lestari.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
[HULU RAJANG]**

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan :

- (a) status pelaksanaan projek membaiki sekolah-sekolah daif di kawasan Parlimen Hulu Rajang ; dan
- (b) sekiranya pihak Kementerian bercadang untuk menambah baik capaian internet di sekolah-sekolah luar bandar di kawasan Parlimen Hulu Rajang

JAWAPAN

Tuan Yang di-Pertua,

Sehingga 6 November 2020, sebanyak 291 buah sekolah yang mempunyai bangunan daif di seluruh negeri Sarawak telah dinaiktaraf dan dibangunkan semula melibatkan kos projek berjumlah RM1.388 billion.

Khusus di kawasan Parlimen Hulu Rajang, terdapat 8 projek menaik taraf dan pembangunan semula bangunan daif di sekolah telah diluluskan dengan kos berjumlah RM66.6 juta. Peruntukan ini merangkumi pelaksanaan projek naik taraf dan pembangunan semula bangunan daif di sekolah dengan pelbagai skop projek seperti pembinaan

bilik darjah, blok pentadbiran, asrama, rumah guru, dewan makan, pusat sumber, bilik sains, tandas dan lain-lain kemudahan.

Untuk makluman Ahli Yang Berhormat, sehingga 20 Oktober 2020, dua projek membangunkan semula bangunan daif di sekolah iaitu Sekolah Kebangsaan Long Gang dan Sekolah Kebangsaan Nanga Sempili telah pun siap sepenuhnya. Manakala, satu projek iaitu Sekolah Kebangsaan Abun Matu berada dalam fasa pembinaan dan dijangka siap pada bulan Ogos 2021.

Bagi projek naik taraf dan pembangunan semula di SK Ulu Kakus, projek sedang dalam proses penilaian tender dan Surat Setuju Terima dijangka akan dikeluarkan pada Disember 2020. Manakala bagi SK Sg Tunoh, Kapit, SK Airport, Kapit, SK Batu Keling, Kapit dan SK Ng Oyan, Kapit, Sarawak merupakan projek yang baharu diluluskan di bawah program Pembangunan Semula Sekolah Daif di Sarawak Fasa 2. Projek ini dalam proses reka bentuk dan penyediaan dokumen tender. Tender dijangka akan diiklankan mulai minggu pertama November 2020.

Merujuk kepada capaian internet di sekolah, pada masa ini KPM dalam proses meningkatkan capaian internet ke sekolah di seluruh negara termasuk Parlimen Hulu Rajang. Sehingga kini, KPM telah menyediakan akses internet jalur lebar tanpa wayar berkelajuan 30Mbps kepada 83 sekolah di Parlimen Hulu Rajang. Manakala 11 sekolah lagi akan disediakan akses internet satelit dengan teknologi *Very Small Aperture Terminal* (VSAT) berkelajuan 30Mbps kerana tiada infrastruktur internet jalur lebar di kawasan sekolah berkenaan. Pemasangan VSAT ini dijangka siap pada Februari 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 25 NOVEMBER 2020 (RABU)

SOALAN

TUAN SU KEONG SIONG [KAMPAR] minta **MENTERI KEWANGAN** menyatakan hala tuju Syarikat Penerbangan Nasional (MAS) yang dimiliki oleh Khazanah Nasional Berhad. Adakah Kerajaan akan mempertimbangkan sebarang langkah pemulihan atau penutupan operasi syarikat penerbangan tersebut.

JAWAPAN

Tuan Yang di-Pertua,

Selari dengan pelaksanaan Pelan Pemulihan Malaysian Airline System Bhd (MAS) yang bertujuan menstruktur semula dan memulihkan operasi syarikat penerbangan nasional, Malaysia Airlines Berhad (MAB) telah ditubuhkan pada 7 November 2014. Penubuhan MAB bertujuan untuk mengambil alih operasi, aset dan liabiliti syarikat MAS. MAB seterusnya diletakkan di bawah Malaysia Aviation Group Berhad (MAGB) yang dimiliki sepenuhnya oleh Khazanah Nasional Berhad (Khazanah).

Sehingga kini, Khazanah telah menyuntik kira-kira RM28 bilion ke dalam syarikat penerbangan tersebut manakala jumlah liabiliti MAGB pada masa ini yang akan disusun semula adalah dianggarkan sebanyak RM16 bilion.

Prestasi kewangan MAGB antara tahun 2015 hingga 2018 adalah seperti berikut:

Tahun	Keuntungan/ (Kerugian) - RM
2015	(1.1b)
2016	(0.7b)
2017	(1.2b)
2018	(1.3 b)

Setakat 31 Ogos 2020, jumlah kecairan yang dimiliki oleh Kumpulan MAGB adalah kira-kira RM366 juta selain kira-kira RM578 juta yang tersedia untuk digunakan daripada dana yang diperuntukkan oleh Khazanah. Kesan COVID-19 terhadap industri penerbangan secara global adalah amat buruk dan Malaysia Airlines tidak terkecuali daripada menerima impak daripada penularan pandemik ini. Malaysia Airlines kini beroperasi dengan kira-kira 75% daripada pesawatnya tidak dapat

diterbangkan akibat sekatan perjalanan, dan turut menyaksikan kapasiti dan pendapatannya terjejas.

Untuk makluman, Kerajaan komited untuk membantu semua pihak yang terjejas dengan penularan wabak COVID-19. Oleh itu, Kerajaan melalui Skim Jaminan Prihatin Danajamin (SJPD) menyediakan program pembiayaan bernilai RM50 bilion dengan jaminan sebanyak 80% ke atas pembiayaan bagi modal kerja syarikat. Namun demikian, kemudahan jaminan ini disediakan untuk manfaat kepada semua syarikat yang beroperasi di Malaysia dalam semua sektor termasuk sektor penerbangan tertakluk kepada syarat-syarat kelayakan yang telah ditetapkan.

Bagi mengatasi masalah kewangan MAGB dan MAB, Kerajaan akan mengadakan rundingan lanjut dengan pihak Khazanah bagi mengenal pasti hala tuju syarikat khususnya dalam memperkukuhkan kedudukan kewangannya dan mengenal pasti penyelesaian strategik yang terbaik bagi kumpulan penerbangan tersebut.

Keputusan untuk menutup atau menghentikan operasi MAGB masih belum dilakukan dan bergantung kepada hasil rundingan MAGB dengan pihak pemiutang dan pemajak bagi menstruktur semula syarikat. Dalam masa yang sama, pihak pengurusan Khazanah juga akan melaksanakan usaha terbaik bagi memastikan kebajikan kakitangan kumpulan MAGB terpelihara termasuk, sekiranya perlu, bayaran pampasan yang setimpal yang mematuhi undang-undang pekerjaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

**DARIPADA : TUAN LARRY SOON @
LARRY SNG WEI SHIEN [JULAU]**

TARIKH : 25 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan hasil daripada lawatan kerja Pengarah Bomba dan Penyelamat Negeri Sarawak ke Julau bulan September lalu, adakah Kementerian akan meluluskan pembinaan Balai Bomba dan Penyelamat atau Balai Bomba Kategori E untuk daerah Julau.

JAWAPAN

Tuan Yang di-Pertua,

1. Untuk makluman Yang Berhormat, lawatan kerja Pengarah Jabatan Bomba dan Penyelamat Malaysia (JBPM) Negeri Sarawak ke Julau pada 17 September 2020 lalu telah mengenal pasti satu tapak balai bomba yang merupakan tanah kerajaan berkeluasan 5.75 ekar berhampiran Sekolah Menengah Kebangsaan Julau. Pada masa kini, JBPM sedang melengkapkan dokumen permohonan kepada Jabatan Ketua Pengarah Tanah dan Galian Persekutuan Negeri Sarawak untuk menggunakan sebahagian tapak tanah berkenaan bagi cadangan pembinaan balai bomba kategori E di daerah Julau. Walau bagaimanapun, pembinaan balai ini adalah tertakluk kepada kelulusan permohonan tapak serta kedudukan kewangan semasa kerajaan.

2. Untuk makluman Yang Berhormat juga, kawasan Julau kini mendapat perlindungan kebakaran dari Balai Bomba dan Penyelamat Bintangor dengan jarak lebih kurang 45 kilometer. Khidmat kebombaan di kawasan Julau dibantu oleh Pasukan Bomba Sukarela Pekan Julau dengan kekuatan 20 orang anggota dan sebuah kenderaan bomba sukarela Proton Arena yang dilengkapi dengan pam angkut dan hos bagi tujuan pemadaman.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 25 NOVEMBER 2020 (RABU)

SOALAN

DATIN PADUKA DR. TAN YEE KEW [WANGSA MAJU] minta **MENTERI KEWANGAN** menyatakan :-

- (a) apakah langkah Kerajaan untuk mengukuh dan menstabilkan ekonomi negara memandangkan ekonomi global mengalami kemelesetan paling teruk akibat gelombang ketiga pandemik COVID-19 ; dan
- (b) senaraikan jumlah peruntukan yang telah disalurkan bagi setiap kategori pakej yang bertujuan merangsang ekonomi.

JAWAPAN

Tuan Yang di-Pertua,

1. Dalam menangani krisis berikutan pandemik COVID-19, Kerajaan telah menggunakan pendekatan 6R yang bertujuan menyelamatkan nyawa, melindungi pekerjaan dan meningkatkan daya tahan ekonomi. Kerajaan telah mengambil langkah proaktif dengan memperkenalkan Pakej Rangsangan Ekonomi Prihatin Rakyat (PRIHATIN), Pelan Jana Semula Ekonomi Negara (PENJANA) dan Kerangka Inisiatif Tambahan Prihatin (KITA PRIHATIN) yang berjumlah RM305 bilion untuk menyokong isi rumah dan perniagaan serta memulihkan ekonomi. Sehingga 6 November

2020, daripada RM260 bilion yang diperuntukkan bagi PRIHATIN, sebanyak RM154.8 bilion atau 60 peratus telah dibelanjakan. Manakala daripada RM35 bilion yang diperuntukkan bagi PENJANA, sebanyak RM14.1 bilion atau 40 peratus telah dibelanjakan. Di samping itu, daripada RM10 bilion yang diperuntukkan bagi KITA PRIHATIN, sebanyak RM4.9 bilion atau 49 peratus telah dibelanjakan.

2. Berikutan dari pelaksanaan pakej rangsangan dan pembukaan semula ekonomi, ekonomi Malaysia mencatat penguncupan yang lebih kecil sebanyak 2.7 peratus pada suku ketiga 2020 berbanding negatif 17.1 peratus pada suku tahunan sebelumnya terutamanya disokong oleh aktiviti ekonomi negara yang kembali beroperasi sejak pelaksanaan Perintah Kawalan Pergerakan Pemulihan (PKPP) dan prestasi eksport bersih yang bertambah baik. Secara keseluruhan, semua sektor ekonomi mengalami penguncupan kecuali sektor pembuatan yang mencatatkan pemulihan dan melonjak kepada 3.3 peratus pada suku ketiga 2020 berbanding penyusutan dua digit 18.3 peratus yang direkodkan pada suku tahunan sebelumnya dipacu oleh industri berorientasikan eksport. Selari dengan sektor ekonomi yang kembali beroperasi, kadar pengangguran turun kepada 4.7 peratus pada suku ketiga tahun ini berbanding 5.1 peratus pada suku tahunan sebelumnya.

3. Gelombang ketiga pandemik COVID-19 yang melanda ekonomi global termasuk Malaysia dijangka memberi impak yang minima terhadap ekonomi negara. Pelaksanaan langkah pakej rangsangan ekonomi yang masih diteruskan seperti pindahan tunai Bantuan Prihatin Nasional 2.0, pengeluaran i-Lestari dan i-Sinar KWSP, moratorium pinjaman secara bersasar dan Program Subsidi Upah 2.0 akan menyokong perbelanjaan pengguna dan pihak swasta serta mengimbangi penguncupan ekonomi negara secara keseluruhan pada 2020. Seperti yang diumumkan semasa pembentangan Belanjawan 2021, ekonomi Malaysia bagi tahun 2020 dianggar menguncup sebanyak 4.5 peratus sebelum kembali pulih dan berkembang antara 6.5 peratus hingga 7.5 peratus pada tahun 2021.

4. Ekonomi negara dijangka bertambah baik dan kembali pulih pada 2021 berikutan tindak balas proaktif Kerajaan dalam menangani krisis ekonomi serta jangkaan pengkomersialan vaksin COVID-19 yang lebih cepat akan memberi kesan positif terhadap pertumbuhan ekonomi global. Dari sudut penawaran, kesemua sektor utama ekonomi negara diunjur kembali berkembang diterajui oleh sektor perkhidmatan dan pembuatan. Sektor perkhidmatan diunjur meningkat 7 peratus disokong oleh subsektor perdagangan borong dan runcit; maklumat dan komunikasi; kewangan dan insurans; dan aktiviti berkaitan pelancongan manakala sektor pembuatan dijangka berkembang sebanyak 7 peratus didorong oleh peningkatan berterusan dalam industri berorientasikan eksport dan domestik.

5. Dari sudut permintaan, perbelanjaan swasta akan terus menerajui pertumbuhan. Penggunaan swasta diunjur kembali pulih sebanyak 7.1 peratus disokong oleh pendapatan boleh guna yang lebih tinggi serta prospek pekerjaan yang lebih baik berikutan ekonomi beroperasi dalam guna tenaga penuh. Pelaburan swasta turut dijangka kembali pulih sebanyak 6.7 peratus didorong oleh penerusan projek utama infrastruktur dan peningkatan pelaburan terutamanya dalam sektor pembuatan berikutan peningkatan dalam perdagangan global. Sektor awam akan terus memainkan peranan sebagai fasilitator melalui pelaksanaan pelbagai inisiatif untuk merancak dan mencergaskan aktiviti perniagaan seperti penubuhan dana untuk menyokong pendigitalan terutamanya kepada PKS serta inisiatif MalaysiaMudah (#MyMudah) dan penubuhan Unit Penyelarasan dan Kemajuan Projek (PACU) bagi memudah cara operasi perniagaan dan memacu aktiviti pelaburan swasta.

6. Kerajaan terus komited untuk memulih dan merancakkan semula pertumbuhan ekonomi demi memperkukuh daya tahan negara dalam mendepani sebarang bentuk krisis. Kesemua inisiatif dan program yang telah diumumkan menerusi pakej rangsangan ekonomi serta Belanjawan 2021 dijangka dapat memastikan pertumbuhan ekonomi yang lebih mampan demi meningkatkan kesejahteraan rakyat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN SIM TZE TZIN [BAYAN BARU]

TARIKH : 25 NOVEMBER 2020 (RABU)

SOALAN

TUAN SIM TZE TZIN [BAYAN BARU] minta **MENTERI KEWANGAN** menyatakan membentangkan projek rundingan terus kerajaan Perikatan Nasional dari 1 Mac hingga 31 Oktober 2020. Senaraikan mengikut projek dan nilai.

JAWAPAN

Tuan Yang Di Pertua,

Untuk makluman Yang Berhormat,

Perolehan Kerajaan dilaksanakan berdasarkan prinsip perolehan Kerajaan iaitu persaingan terbuka, akauntabiliti awam, ketelusan, nilai faedah terbaik serta adil dan saksama seperti yang digariskan oleh peraturan dan tatacara di dalam Arahan Perbendaharaan dan Pekeliling Perbendaharaan. Walau bagaimanapun, Kerajaan membenarkan pelaksanaan perolehan secara rundingan terus berdasarkan Garis Panduan Permohonan Perolehan Secara Rundingan Terus yang menetapkan permohonan hanya boleh dikemukakan berasaskan lima (5) kriteria khusus seperti berikut:

- i. Kesegeraan atas kepentingan awam di mana sekiranya tidak dilaksanakan segera akan memberi impak negatif kepada penyampaian perkhidmatan awam;
- ii. Bagi maksud penyeragaman untuk memastikan kesesuaian penggunaan (*compatibility*) antara barangan sedia ada dengan barangan baru yang akan dibeli;
- iii. satu punca bekalan/perkhidmatan yang mana hanya satu syarikat sahaja boleh membekalkan barangan/perkhidmatan yang dikehendaki
- iv. melibatkan keselamatan/strategik bagi pembelian alat keselamatan atau projek strategik yang perlu dirahsiakan demi kepentingan negara; atau
- v. kontrak dengan syarikat pembuat Bumiputera yang memenuhi semua syarat kelayakan demi memupuk pertumbuhan syarikat Bumiputera yang bertaraf pembuat

Sejak diperkenalkan mulai tahun 2015, penambahbaikan berterusan telah dilaksanakan terhadap garis panduan ini bagi memastikan ia kekal relevan. Antara penambahbaikan terkini yang telah dilaksanakan mulai tahun 2019 adalah dengan mewajibkan Kementerian/Agensi untuk melaksanakan penilaian terhadap syarikat yang dicadangkan. Ini bagi memastikan hanya syarikat yang benar-benar berkeupayaan dari segi kewangan dan teknikal dipertimbangkan untuk perolehan secara rundingan terus.

Sebagai langkah kawalan, Kementerian/Agensi perlu mengemukakan permohonan perolehan secara rundingan terus berdasarkan kriteria di atas kepada Kementerian Kewangan untuk pertimbangan dan kelulusan sebelum perolehan boleh dilaksanakan.

Selain itu, peraturan perolehan Kerajaan juga diperkemaskan melalui surat arahan Kementerian Kewangan bertarikh 29 Jun 2018 yang memansuhkan kaedah perolehan secara tender terhad yang mana dasar ini masih berkuat kuasa sehingga sekarang

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 25 NOVEMBER 2020 (RABU)

SOALAN

TUAN AHMAD FAHMI BIN MOHAMED FADZIL [LEMBAH PANTAI] minta **MENTERI KEWANGAN** menyatakan jumlah perniagaan yang ditutup dari Mac hingga Oktober 2020, jumlah pekerja yang dibuang, dan adakah suntikan fiskal dan langkah-langkah lain Kerajaan setakat ini mencukupi untuk mengelakkan kesan lebih buruk terhadap ekonomi.

JAWAPAN

Tuan Yang di-Pertua,

1. Pandemik COVID-19 ini telah menjejaskan kestabilan ekonomi negara dan mengakibatkan sektor-sektor ekonomi dalam negara menghadapi kesukaran berikutan kejatuhan mendadak permintaan dan gangguan rantai bekalan global yang seterusnya mengakibatkan penutupan operasi perniagaan dan juga pemberhentian pekerja. Terkesan akibat penularan pandemik COVID-19, KDNK negara diunjur menyusut sebanyak 4.5 peratus pada 2020 sebelum kembali melonjak antara 6.5 peratus hingga 7.5 peratus pada 2021.

Tuan Yang di-Pertua,

2. Entiti perniagaan di bawah kawal selia Suruhanjaya Syarikat Malaysia (SSM) meliputi Perniagaan (Milikan Tunggal dan Perkongsian) di bawah Akta Pendaftaran Perniagaan 1956; Syarikat (Sendirian Berhad, Berhad dan Syarikat Berhad menurut Jaminan) di bawah Akta Syarikat 2016; dan Perkongsian Liabiliti Terhad di bawah Akta Perkongsian Liabiliti Terhad 2012.

3. Berdasarkan rekod SSM bagi tempoh Mac hingga Oktober 2020, sebanyak 15,273 penamatan atau pengulungan entiti perniagaan. Namun begitu, jumlah penamatan atau pengulungan entiti perniagaan ini adalah lebih rendah berbanding tempoh yang sama bagi tahun 2019 iaitu sebanyak 21,939 entiti perniagaan. Ini terutamanya disebabkan oleh pelbagai bentuk insentif sedia ada dan insentif baharu yang telah diperkenalkan melalui Pakej Rangsangan Ekonomi Prihatin Rakyat (PRIHATIN), PRIHATIN PKS+, Pelan Jana Semula Ekonomi (PENJANA) dan KITA PRIHATIN yang bernilai RM305 bilion. Selain itu, Kerajaan melalui SSM juga turut memberi kelonggaran syarat iaitu kenaikan ambang keberhutangan dari RM10,000 ke RM50,000 dan pelanjutan tempoh menjawab notis tuntutan daripada 21 hari ke 6 bulan. Ini secara tidak langsung dapat membantu entiti perniagaan untuk kekal menjalankan aktiviti perniagaan.

4. Terdapat syarikat atau majikan yang terpaksa mengambil langkah-langkah penjimatan kos seperti pengecilan dan penutupan sebahagian besar operasi serta melaksanakan pemberhentian pekerja demi memastikan kelangsungan perniagaan. Sehubungan dengan itu, kehilangan pekerjaan telah meningkat dengan ketara dan mencatat jumlah tertinggi iaitu seramai 18,579 orang pada Jun 2020. Ini seterusnya menyebabkan kadar pengangguran turut meningkat dan merekodkan kadar tertinggi iaitu 5.3 peratus pada Mei 2020 dengan bilangan penganggur meningkat 58.9% kepada 826,100 orang berbanding tahun sebelumnya. Namun begitu dengan pelaksanaan insentif-insentif seperti insentif PenjanaKerjaya, program peningkatan kemahiran dan latihan semula dan Program Subsidi Upah Bersasar, data kehilangan pekerjaan telah menunjukkan penurunan iaitu dari bulan Jun (18,579 pekerjaan); kepada Julai (16,660 pekerjaan); Ogos (9,261 pekerjaan); dan September (7,388 pekerjaan).

Tuan Yang di-Pertua,

5. Meskipun ekonomi Malaysia dianggarkan mengalami kerugian sebanyak RM2 bilion setiap hari dalam tempoh PKP, namun menyelamatkan nyawa rakyat merupakan tumpuan utama Kerajaan di sebalik tindakan berkenaan. Dalam menangani kesan pandemik COVID-19, Kerajaan telah mengguna pakai 6R. Strategi ini merangkumi enam tahap iaitu Ketegasan (*Resolve*), Membina Ketahanan (*Resilient*), Menjana Semula (*Restart*), Strategi Pemulihan (*Recovery*), Memperkasa (*Revitalise*) dan Menyusun Semula (*Reform*) bagi mengatasi cabaran pandemik ini.

6. Justeru, kegiatan ekonomi dijangka meningkat secara beransur-ansur pada tempoh separuh kedua tahun 2020 berikutan penarikan semula PKP secara berperingkat dan langkah-langkah rangsangan ekonomi yang telah diumumkan melalui Belanjawan 2021.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan adakah terdapat kesan terhadap peluang pelajar untuk memohon kemasukan ke Kolej Vokasional memandangkan kini permohonan ke SBP, SMKA, KV, SMT dan MTD terpaksa melalui 'Single Entry Point' dan Pentaksiran Kemasukan Sekolah Khusus (PKSK).

JAWAPAN

Susulan pengumuman YB Menteri Kanan Pendidikan mengenai pembatalan Ujian Penilaian Sekolah Rendah (UPSR) dan Pentaksiran Tingkatan 3 (PT3) pada 15 April 2020, Kementerian Pendidikan telah memperkenalkan satu kaedah baharu bagi pemilihan murid untuk kemasukan ke Sekolah Berasrama Penuh (SBP), Sekolah Menengah Kebangsaan Agama (SMKA), Sekolah Menengah Teknik (SMT) dan Kolej Vokasional (KV) dan Maktab Tentara Diraja (MTD).

Pentaksiran Kemasukan Sekolah Khusus (PKSK) merupakan satu mekanisme saringan pemilihan murid mengikut syarat dan kriteria kemasukan yang ditetapkan oleh sekolah khusus masing-masing.

Kementerian Pendidikan Malaysia berpandangan penggunaan *single entry point* dan PKSK tidak menjejaskan peluang murid untuk memohon ke Kolej Vokasional (KV) kerana tidak ada kekangan ke atas

murid untuk memohon iaitu semua murid Tingkatan 3 tahun 2020 layak untuk memohon ke Sekolah Khusus.

Selain itu, pelaksanaan permohonan kemasukan secara *single entry point* dapat mengelakkan pertindihan penawaran. Murid akan ditawarkan hanya satu tempat sahaja dan ini akan memberikan peluang yang lebih banyak kepada murid lain untuk menerima tawaran kemasukan ke Sekolah Khusus.

Penawaran kemasukan juga adalah berdasarkan pilihan murid samada pilihan pertama, kedua atau ketiga. Namun sekiranya murid tidak berjaya ditawarkan ke mana-mana Sekolah Khusus, mereka boleh membuat rayuan.

Oleh yang demikian, pelaksanaan permohonan secara *single entry point* dan pentaksiran kemasukan memberikan peluang yang sama kepada semua murid bagi kemasukan ke KV, Sekolah Menengah Teknik (SMT), Sekolah Berasrama Penuh (SBP), Sekolah Menengah Kebangsaan Agama (SMKA) dan Maktab Tentera Diraja (MTD).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan hala tuju Kerajaan Perikatan Nasional berhubung dengan Pengiktirafan Sijil Peperiksaan Bersama (UEC) pada masa kini. Adakah Kerajaan Perikatan Nasional akan meneruskan proses dan mengumumkan hasil kajian yang telah dijalankan oleh Kerajaan terdahulu berkenaan proses pengiktirafan Sijil Peperiksaan Bersama (UEC) tersebut.

JAWAPAN

Tuan yang DiPertua,

Pada 29 Ogos 2018, Yang Berhormat Menteri Pendidikan ketika itu telah mengumumkan penubuhan Pasukan Petugas Dasar *Unified Examination Certificate* (PPDUEC) untuk mengkaji isu pengiktirafan sijil UEC sebagai syarat am kelayakan bagi memasuki institusi pengajian tinggi awam (IPTA). Tiga orang ahli PPDUEC yang dilantik pada 29 Oktober 2018 mula menjalankan kajian mulai 29 November 2018. Untuk makluman Ahli Yang Berhormat, KPM mengiktiraf peranan PPDUEC sepertimana yang termaktub di dalam Terma Rujukan PPDUEC.

Berdasarkan Terma Rujukan, PPDUEC diberi tempoh sehingga enam bulan untuk mengemukakan laporan kajian kepada KPM selewat-lewatnya pada 28 Mei 2019. Walau bagaimanapun, pihak PPDUEC tidak dapat menyiapkan laporan berkenaan. Oleh itu, tempoh kajian telah dilanjutkan sebanyak enam kali sehingga Februari 2020.

KPM sentiasa berhubung dengan Pengerusi PPDUEC untuk mendapatkan status kemajuan laporan tersebut. Kali terakhir KPM menghubungi beliau adalah pada 2 November 2020. KPM telah dimaklumkan oleh Pengerusi PPDUEC bahawa draf akhir laporan tersebut telah disediakan. Namun, sehingga kini PPDUEC masih gagal menyerahkan laporan kajian berkenaan.

Memandangkan laporan tidak pernah diterima oleh KPM, tiada sebarang hasil kajian dapat diperhalusi atau diteliti oleh pihak Kementerian. KPM akan mengambil tindakan sewajarnya terhadap laporan tersebut sekiranya ia diserahkan kepada KPM.

Pada masa ini, KPM berpendirian sekiranya mahu dipertimbangkan penyelesaiannya oleh kerajaan, UEC perlu mengikut Dasar Pendidikan Kebangsaan.

Sekian, terima kasih.

**PEMBERITAHUAN PERTANYAAN BAGI JAWAB LISAN
DEWAN RAKYAT MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : PUAN YEO BEE YIN [BAKRI]

TARIKH : 25 NOVEMBER 2020 (RABU)

SOALAN

Minta **MENTERI TENAGA DAN SUMBER ASLI** menyatakan :-

status terkini penuntutan semula tunggakan Akaun Amanah Industri Bekalan Elektrik (AAIBE) dari penjana-penjana kuasa bebas (IPP) yang telah ditangguh disebabkan oleh Perintah Kawalan Pergerakan (PKP) dan tindakan Kementerian memastikan tunggakan dikutip.

JAWAPAN

Tuan Yang di-Pertua,

1. Kementerian masih meneruskan usaha untuk menuntut semula tunggakan daripada penjana-penjana elektrik mengikut jadual bayaran ansuran yang telah dipersetujui dengan syarikat-syarikat tersebut. Penjana-penjana elektrik telah mula melaksanakan pembayaran sumbangan tertangguh mulai Julai 2020 mengambil kira penguatkuasaan PKP dan penstrukturan semula Kementerian sebelum ini. Bagi tempoh Julai hingga Oktober 2020, jumlah tunggakan yang telah dikutip oleh AAIBE ialah RM 38.43 juta. Baki sebanyak RM 105.69 juta dijangka akan dikutip sepenuhnya pada tahun 2021.

2. Kementerian memantau perkara ini secara konsisten melalui Mesyuarat Jawatankuasa Akaun Amanah Industri Bekalan Elektrik dan peringatan secara berkala turut diberikan kepada penjana-penjana elektrik. Setakat ini, semua penjana elektrik memberikan kerjasama yang baik dalam menyelesaikan tunggakan sumbangan. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : DATO' MAHFUZ BIN HAJI OMAR [POKOK SENA]

TARIKH : 25 NOVEMBER 2020 (RABU)

SOALAN

DATO' MAHFUZ BIN HAJI OMAR [POKOK SENA] minta **MENTERI KEWANGAN** menyatakan berapa jumlah hutang 1MDB dan SRC International yang perlu dibayar oleh Kerajaan pada tahun 2021 dan nyatakan sumber kewangan yang akan digunakan bagi tujuan pembayaran hutang tersebut

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan situasi kewangan 1Malaysia Development Bhd (1MDB) dan SRC International Sdn Bhd (SRC) yang kritikal berikutan skandal dan penyelewengan yang dihadapi, kedua-dua syarikat tersebut kini tidak lagi beroperasi secara aktif dan tidak mampu untuk memenuhi obligasi pembayaran hutang yang dijamin oleh Kerajaan, sama ada secara langsung atau tidak langsung.

Bagi 1MDB, jumlah keseluruhan baki hutang 1MDB (prinsipal dan faedah) pada 31 Oktober 2020 adalah sebanyak RM40.87 bilion manakala jumlah hutang 1MDB yang perlu dibayar pada tahun 2021 adalah sebanyak **RM1.705 bilion** yang melibatkan bayaran faedah/kupon bagi 3 bon dan 1 sukuk terbitan 1MDB dan anak syarikatnya. Jumlah ini adalah berdasarkan andaian kadar tukaran wang asing pada RM4.20 bagi setiap USD1.00. Pembayaran balik hutang 1MDB bagi tahun 2021 ini akan dibuat dengan menggunakan dana pemulihan aset 1MDB dan peruntukan kewangan Kerajaan.

Bagi SRC pula, Kumpulan Wang Persaraan Diperbadankan (KWAP) telah bersetuju untuk menstrukturkan semula kemudahan pembiayaan yang telah diberikan kepada SRC berjumlah RM4 billion berkuat kuasa mulai tahun 2020 untuk tempoh sehingga 28 Mac 2022. Jumlah baki pinjaman setelah penstrukturan semula adalah RM3.67 bilion yang merangkumi prinsipal dan faedah pinjaman. Bagi tahun 2021, jumlah pembayaran yang dijadualkan kepada KWAP adalah sebanyak **RM1.567 bilion** merangkumi pembayaran prinsipal sebanyak RM1.5 bilion dan pembayaran faedah sebanyak RM67.1 juta yang akan dibayar melalui peruntukan kewangan Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : TUAN CHARLES ANTHONY SANTIAGO
[KLANG]**

TARIKH : 25 NOVEMBER 2020 (RABU)

SOALAN

TUAN CHARLES ANTHONY SANTIAGO [KLANG] minta **MENTERI KEWANGAN** menyatakan langkah-langkah Bank Negara Malaysia bagi membendung pengubahan wang haram (*illicit financial flows*) dan kebocoran data dari pihak bank. Adakah Kerajaan bercadang untuk menggubal Akta Pengubahan Wang Haram agar institusi perbankan yang terlibat dikenakan hukuman yang lebih berat.

JAWAPAN

Tuan Yang di-Pertua,

1. Untuk makluman Ahli Yang Berhormat, Akta Pencegahan Pengubahan Wang Haram, Pencegahan Keganasan dan Hasil daripada Aktiviti Haram 2001 (AMLA) memperuntukkan rangka kerja yang menyeluruh untuk membanteras pengaliran wang haram (*illicit financial flows*). Bagi mencegah pengubahan wang haram, institusi pelapor di bawah AMLA wajib menjalankan usaha wajar terhadap setiap pelanggan (*customer due diligence*), menyimpan rekod, membuat laporan nilai ambang transaksi wang tunai (*Cash Threshold Reports*, CTR) dan melaporkan transaksi kewangan yang mencurigakan (*Suspicious Transaction Reports*, STR) kepada Bank Negara Malaysia (BNM).
2. Di bawah Bahagian VI AMLA, sekiranya disabitkan kesalahan, penjenayah-penjenayah pengubahan wang haram bukan sahaja akan dikenakan hukuman penjara, malah harta-harta yang diperolehi mereka menerusi kegiatan haram juga akan dilucuthakkan. Pengenalan had transaksi tunai di bawah Akta Mata Wang 2020 juga mewajibkan semua pihak untuk menolak pembayaran tunai bernilai tinggi bagi melindungi mereka daripada terlibat dalam membantu pengubahan wang.
3. Isu kebocoran data atau maklumat pelanggan oleh institusi perbankan adalah tertakluk kepada peruntukan kerahsiaan di bawah Akta Perkhidmatan Kewangan 2013 (APK), Akta Perkhidmatan Kewangan Islam 2013 (APKI) dan Akta Institusi Kewangan Pembangunan 2002 (AIKP). Sekiranya terdapat bukti yang mencukupi untuk mensabitkan pelaku terbabit di bawah APK, APKI dan AIKP, pesalah boleh dikenakan denda tidak melebihi RM10 juta atau dipenjarakan untuk tempoh maksimum lima (5) tahun atau kedua-duanya sekali.
4. Selain itu, institusi perbankan juga tertakluk kepada piawaian Pengurusan Maklumat Pelanggan dan Penzahiran yang Dibenarkan. Piawaian ini menghendaki institusi perbankan menetapkan dasar dan prosedur yang ketat untuk melindungi keselamatan dan kerahsiaan maklumat pelanggan sepanjang kitaran hayat maklumat, daripada

peringkat kutipan sehingga penghapusan. Ini termasuk melindungi maklumat daripada diakses, diubah atau didedahkan tanpa kebenaran serta memastikan kakitangan institusi perbankan mendapat latihan secukupnya untuk melaksanakan kawalan yang cekap. Piawaian ini juga menetapkan tanggungjawab institusi perbankan untuk memastikan maklumat pelanggan diurus dengan betul oleh wakil yang dilantik, ejen dan penyedia perkhidmatan ketiga.

5. Untuk makluman Ahli Yang Berhormat juga, sekiranya terdapat aduan kebocoran maklumat pelanggan, institusi perbankan dikehendaki menyiasat aduan tersebut dan melaporkannya kepada BNM. Dalam hal ini, antara tindakan yang pernah diambil oleh BNM termasuklah mengkompaun atau mendakwa pesalah sama ada institusi perbankan atau individu di bawah APK, APKI dan AIKP, mengarahkan institusi perbankan supaya mengukuhkan kawalan dalaman terhadap keselamatan maklumat pelanggan, mengkaji semula pengaturan penyumberan luar dan lain-lain tindakan untuk menangani punca kebocoran maklumat pelanggan. Selain itu, pihak institusi perbankan juga dikehendaki untuk menggiatkan lagi pelaksanaan audit dalaman atau audit bebas yang mana hasil laporan mengenainya perlu dimaklumkan kepada BNM.

6. BNM turut menjalankan pemeriksaan ke atas institusi perbankan dari semasa ke semasa bagi memastikan institusi perbankan mempunyai polisi, prosedur, sistem dan kawalan dalaman yang efektif untuk memastikan maklumat pelanggan sentiasa terpelihara. Sekiranya terdapat kelemahan dalam kawalan dalaman yang boleh menyebabkan risiko kebocoran maklumat pelanggan, institusi perbankan akan diarahkan untuk mengambil tindakan pembetulan dengan kadar segera dan tindakan penguatkuasaan akan diambil sekiranya institusi perbankan gagal mematuhi arahan sedemikian. Tindakan penguatkuasaan yang tegas akan diambil terhadap kes-kes yang serius, termasuklah penamatan perkhidmatan pegawai-pegawai kanan institusi perbankan yang terbabit. AMLA telah pun dipinda pada tahun 2014 untuk mengenakan hukuman yang lebih berat kepada institusi perbankan yang terlibat. Sebagai contoh, hukuman di bawah seksyen 17 AMLA (penyimpanan rekod selama tempoh sekurang-kurangnya enam tahun) telah ditingkatkan kepada denda tidak melebihi

RM3 juta atau dipenjarakan selama tempoh tidak melebihi 5 tahun atau kedua-duanya. Selain itu, AMLA telah dipinda dengan memasukkan seksyen 14A yang menjelaskan larangan terhadap penzahiran laporan dan maklumat berkaitan.

7. BNM sentiasa memantau institusi-institusi kewangan melalui *off-site* dan penyeliaan *on-site* untuk memastikan mereka mematuhi obligasi di bawah AMLA dan polisi yang dikeluarkan berkenaan pencegahan pengubahan wang haram dan pembiayaan keganasan (*Anti-Money Laundering and Counter Financing of Terrorism, AML/CFT*). BNM juga turut berkerjasama dengan pegawai pematuhan dari institusi-institusi pelapor menerusi sesi taklimat dan dialog serta mengambil tindakan pembetulan melalui penyeliaan yang lebih komprehensif/rapi (*supervisory corrective action*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

**DARIPADA : DATO' SERI DR. WAN AZIZAH WAN ISMAIL
[PANDAN]**

TARIKH : 25 NOVEMBER 2020 (RABU)

SOALAN

DATO' SERI DR. WAN AZIZAH WAN ISMAIL [PANDAN] minta **MENTERI KEWANGAN** menyatakan perincian jumlah bantuan kewangan yang telah diberikan kepada petugas barisan hadapan dan jumlah penerima bantuan tersebut, mengikut kategori sektor pekerjaan dan profesion masing-masing.

JAWAPAN

Tuan Yang di-Pertua,

Sebagaimana Yang Berhormat sedia maklum, dalam Pakej Rangsangan PRIHATIN, Kerajaan telah memperuntukkan sebanyak RM600 juta bagi Elaun Khas COVID-19 – Petugas Barisan Hadapan di bawah Kumpulan Wang COVID-19. Elaun khas akan dibayar sehingga berakhir wabak COVID-19 dan kadarnya adalah sebanyak RM600 sebulan bagi petugas kesihatan dan RM200 bagi petugas-petugas lain yang layak tertakluk kepada arahan dan garis panduan yang dikeluarkan oleh Agensi Pengurusan Bencana Negara (NADMA). Sehingga 31 Oktober 2020, Kerajaan telah membelanjakan hampir RM300 juta untuk tujuan tersebut.

Selain itu, untuk tahun 2020, Kerajaan juga telah membayar bantuan khas kewangan sebanyak RM500 sebanyak dua kali bagi pegawai Kerajaan gred 56 & ke bawah, menjadikan setiap penjawat awam termasuk anggota barisan hadapan menerima RM1,000 seorang.

Sebagai tambahan juga, Kerajaan melalui Ucapan Belanjawan 2021 telah bersetuju untuk memberi bantuan khas kewangan sebanyak RM600 kepada pegawai Kerajaan Gred 56 & ke bawah dan khusus untuk Petugas Barisan Hadapan Kesihatan pemberian one-off sebanyak RM500 bagi menghargai jasa anggota barisan hadapan yang dijangka memanfaatkan 100 ribu petugas kesihatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : JAWAB LISAN

DARIPADA : DATUK HAJI HASANUDDIN BIN MOHD YUNUS [HULU LANGAT]

TARIKH : 25 NOVEMBER 2020 (RABU)

SOALAN

DATUK HAJI HASANUDDIN BIN MOHD YUNUS [HULU LANGAT] minta **MENTERI KOMUNIKASI DAN MULTIMEDIA** menyatakan apakah stesen-stesen TV akan mengkaji semula waktu siaran drama dan animasi berbahasa Melayu pada jam 7.00 malam yang tidak menghormati mahupun tidak sesuai disiarkan pada waktu maghrib kerana majoriti penontonnya beragama Islam.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian melalui Jabatan Penyiaran Malaysia (RTM) sentiasa mengkaji kesesuaian slot *belting* atau jajaran siaran programnya agar memenuhi citarasa penonton segenap lapisan masyarakat. RTM sangat peka mengenai slot *belting* atau jajaran drama pada waktu 7 hingga 8 malam di salurannya terutamanya di TV1. Bagaimanapun RTM telah mencuba pelbagai pendekatan sebelum ini dengan menukar kandungan bagi slot berkenaan, termasuk mengadakan perbincangan bersama pihak JAKIM serta meletakkan program ilmiah

seperti *National Geography*. Namun, respon dan permintaan penonton lebih menggemari susunan program seperti sedia ada ketika ini.

Bagi mengimbangi keperluan pelbagai kumpulan penonton di negara ini, RTM menyusun kandungan berunsur rohani dan keagamaan untuk disiarkan dalam tempoh 6 petang hingga 7 malam. Tempoh berkenaan adalah lebih sesuai untuk penonton mendapat maklumat sebelum membuat persediaan untuk beribadah pada jam seterusnya.

Penonton bagaimanapun mempunyai kawalan sepenuhnya terhadap apa yang ingin ditonton. Penonton sentiasa digalakkan untuk menyusun masa tontonan yang bersesuaian dengan keperluan masing-masing. RTM turut menyediakan perkhidmatan video dan audio atas permintaan atau VOD/AOD di platform dalam taliannya iaitu MyKlik dan aplikasi RTM *Mobile*. Perkhidmatan merupakan nilai tambah yang membolehkan penonton menonton pada bila-bila masa mengikut keselesaan.

ASTRO pula menawarkan pelbagai perkhidmatan yang membolehkan para pelanggan menonton rancangan kegemaran pada bila-bila masa dan di mana sahaja. Fungsi rakaman melalui dekoder *Direct to Home (DTH)*, dan program tersedia melalui platform atas talian seperti *On Demand (OD)* dan *ASTRO GO* menyediakan akses kepada kandungan yang tidak lagi terikat kepada waktu tertentu. Maklumat rancangan boleh didapati melalui perkhidmatan *Electronic Program Guide (EPG)* juga dapat membantu pihak pelanggan memilih kandungan yang sesuai untuk tontonan mereka.

Sehubungan itu, dengan adanya pelbagai platform dan perkhidmatan yang disediakan, isu mengenai kesesuaian penyiaran kandungan dan penjadualan rancangan pada masa tertentu tidak relevan kepada penonton kerana mereka dapat melakukan kawalan sendiri kepada corak tontonan rancangan mereka.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 25 NOVEMBER 2020 (RABU)

SOALAN

Minta **MENTERI PENDIDIKAN** menyatakan apakah langkah Kementerian memulihkan sistem pendidikan melibatkan pelajar sekolah rendah dan menengah yang tertinggal jadual pembelajaran selama tempoh pandemik COVID-19.

JAWAPAN

Tuan Yang di-Pertua,

Kementerian Pendidikan Malaysia (KPM) telah melaksanakan beberapa langkah memastikan sesi pengajaran dan pembelajaran (PdP) terus berjalan walaupun menghadapi cabaran wabak COVID-19.

KPM telah menyediakan kaedah pembelajaran dan pengajaran di rumah (PdPR) mengikut kesesuaian guru dan murid. Manual Pembelajaran dan Pengajaran di Rumah telah disediakan untuk membantu guru merancang dan melaksanakan proses PdP secara optimum apabila sekolah ditutup. Pembelajaran yang digariskan dalam Manual PdPR ini menggunakan pendekatan secara dalam talian, luar talian dan secara *off-site*. Sebagai usaha melindungi murid daripada tertinggal sesi pembelajaran, KPM melaksanakan pemantauan terhadap pelaksanaan sesi PdPR yang dijalankan oleh guru. Pemantauan ini dilihat dari segi pendekatan dan kaedah pengajaran yang digunakan serta bilangan murid yang mengikuti sesi PdPR tersebut.

Selain itu, KPM turut melaksanakan penjajaran kurikulum bagi semua mata pelajaran berdasarkan kurikulum sedia ada (KSSR dan KSSM) dengan menyusun semula kandungan, pedagogi dan pentaksiran berdasarkan hasil pembelajaran yang dihasratkan bagi memenuhi keperluan khusus mata pelajaran. Melalui kurikulum yang telah dijajarkan ini, guru boleh merancang PdP dengan melaksanakan kaedah pembelajaran teradun (*blended learning*). Pembelajaran teradun melibatkan penggabungan teknik pengajaran bersemuka di dalam bilik darjah atau pembelajaran di rumah yang dirancang secara berstruktur.

KPM juga telah meminda takwim persekolahan tahun 2020 dengan memaksimumkan tempoh hari persekolahan dan mengurangkan cuti akhir tahun. Ini dapat membantu guru-guru memperoleh tempoh yang mencukupi dalam menyampaikan semua kandungan kurikulum yang diajar kepada murid dan membolehkan murid mempunyai tempoh pembelajaran yang mencukupi.

KPM akan sentiasa berusaha untuk memastikan murid dapat terus mengikuti pembelajaran dengan pelbagai pendekatan, terutamanya dalam keadaan yang mencabar ini. Dalam hal ini, KPM amat menghargai peranan guru dan ibu bapa untuk memastikan pengajaran dan pembelajaran dapat berjalan dengan baik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA
PARLIMEN KEEMPAT BELAS**

PERTANYAAN : LISAN

DARIPADA : TUAN P. PRABAKARAN [BATU]

TARIKH : 25 NOVEMBER 2020 [RABU]

SOALAN

Minta **MENTERI PERUMAHAN DAN KERAJAAN TEMPATAN** menyatakan apakah nama syarikat yang telah menerima projek rundingan terus daripada pihak Kementerian bagi isu sisa pepejal di Taman Beringin.

JAWAPAN

Tuan Yang di-Pertua,

Untuk makluman Yang Berhormat, nama syarikat yang telah menerima projek rundingan terus daripada Kementerian Perumahan dan Kerajaan Tempatan (KPKT) bagi projek Mereka Bentuk, Membina dan Mengoperasikan Stesen Pemindahan Sisa Pepejal Baharu di Taman Beringin, Kepong ialah Bumi Segar Indah Sdn. Bhd.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA 2020, PENGGAL KETIGA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI [LUMUT]**

TARIKH : 25 NOVEMBER 2020 (RABU)

SOALAN

Minta **MENTERI PENGAJIAN TINGGI** menyatakan apakah pelan jangka pendek dan panjang Kementerian untuk menghasilkan graduan doktor yang berkualiti tinggi untuk memenuhi keperluan kesihatan negara.

JAWAPAN

Tuan Yang di-Pertua,

Kementerian Pengajian Tinggi secara berterusan melaksanakan pelbagai bentuk strategi bagi memperkasakan kualiti pendidikan bidang perubatan bagi melahirkan graduan kedoktoran yang berkualiti dan memenuhi keperluan industri kesihatan negara. Antara langkah yang dilaksanakan adalah dengan menjalankan kajian hala tuju bidang bagi tempoh 5 tahun.

Kementerian dengan kerjasama Majlis Dekan Perubatan Universiti Awam pada tahun 2019 telah menjalankan Kajian Hala Tuju Bidang Perubatan. Hasilnya, satu pelan tindakan bagi meningkatkan kualiti pendidikan dan latihan perubatan di Malaysia telah dibangunkan. Antara aspek utama pendidikan yang ditekankan melalui pelan tersebut termasuklah kurikulum program, governan, aksesibiliti, tenaga pengajar serta persekitaran pembelajaran.

Perancangan Pelan Jangka Pendek yang digariskan adalah:

- i. Memperkasakan usaha menyelaraskan dan memantau pelaksanaan program perubatan dan kesihatan dengan memperluaskan peranan Jawatankuasa Teknikal Bersama sedia ada. Pelantikan ahli Jawatankuasa ini adalah di kalangan Kementerian Kesihatan Malaysia, Majlis Perubatan Malaysia (MMC), Kementerian Pengajian Tinggi (KPT), Agensi Kelayakan Malaysia (MQA) dan Majlis Dekan Perubatan;
- ii. Kedua, meningkatkan peranan Majlis Dekan sebagai badan penasihat kepada KPT dalam hal pendidikan perubatan;
- iii. Mengharmonikan usaha sama antara Universiti Awam (UA) dan Institusi Pendidikan Tinggi Swasta (IPTS) melalui Integrasi Majlis Dekan, Perkongsian Sumber, dan Perkongsian Tenaga Pengajar Pakar;
- iv. Memperkemas proses dan kaedah kemasukan pelajar bidang perubatan dengan mempertimbang laluan masuk yang lebih terbuka di mana pelajar boleh memasuki program mengikut beberapa tahap iaitu sama ada lepasan matrikulasi, diploma atau ijazah pertama; dan
- v. Menambahbaik keupayaan teknologi dalam fasiliti pengajaran dan pembelajaran (PdP) perubatan dengan menaik taraf infrastruktur dan akses internet.

Bagi jangka panjang pula, antara strategi yang telah digariskan adalah:

- i. Menyediakan kurikulum perubatan tersedia masa hadapan yang lebih fleksibel bagi membuka peluang pekerjaan atau pilihan kerjaya yang lebih luas kepada graduan perubatan selepas tamat pengajian. Struktur kurikulum perubatan bukan sahaja tertumpu kepada pembelajaran bidang, namun perlu dikembangkan dalam pelbagai bentuk pendekatan pembelajaran termasuk *work based learning*, keusahawanan dan pembelajaran sepanjang hayat melibatkan penggunaan teknologi baharu;

- ii. Mewujudkan standard kurikulum program kepakaran perubatan yang khusus untuk rujukan semua institusi. Langkah ini dilaksanakan dengan membangunkan kurikulum nasional program kepakaran pasca siswazah bagi melatih pakar-pakar perubatan negara yang berkualiti;
- iii. Mendapatkan pengiktirafan global kurikulum perubatan universiti-universiti di Malaysia melalui pengiktirafan dari pelbagai majlis perubatan antarabangsa seperti *World Federation for Medical Education* (WFME);
- iv. Menyediakan polisi yang jelas berhubung guna sama infrastruktur pendidikan dan latihan perubatan untuk mendorong kemajuan dan kesetaraan kualiti program di UA dan IPTS melalui kaedah perkongsian dan persaingan yang lebih sihat; dan
- v. Memperkemas polisi dan kaedah kawalan pelajar ke luar negara bagi mengatasi isu lambakan graduan perubatan selain meningkatkan pasaran dan kemasukan pelajar tempatan dan luar negara ke IPTS dalam negara yang menawarkan program perubatan.

Sekian, terima kasih.

**PEMBERITAHUAN PERTANYAAN
DEWAN RAKYAT MALAYSIA
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 25 NOVEMBER 2020 (RABU)

SOALAN

minta **MENTERI PEMBANGUNAN LUAR BANDAR** menyatakan adakah perancangan yang menyeluruh dapat dilaksanakan untuk membina jalan raya yang boleh menghubungkan beberapa kampung di Pulau Sebatik iaitu dari Kg Bergosong Kecil hingga ke Kg Sungai Melayu yang terletak di sempadan Malaysia - Indonesia. Memandangkan hanya sebuah sekolah menengah terdapat di Pulau Sebatik iaitu SMK Wallace Bay, anak-anak dari kawasan-kawasan yang tiada akses jalan raya ini tidak dapat bersekolah di sekolah tersebut

JAWAPAN

Tuan Yang di-Pertua,

Untuk makluman Yang Berhormat, Projek Membina Jalan dari Kampung Sungai Pukul Ke Kampung Sungai Bergosong, Sebatik, Tawau, Sabah telah diluluskan di bawah Rancangan Malaysia Kesebelas *Rolling Plan* Keempat (RMKe-11, RP4) Tahun 2020 dengan kos sebanyak RM50.0 juta dan skop membina jalan sepanjang 13.0 km dengan spesifikasi JKR R1. Status terkini adalah di peringkat penentuan skop dan kerja awalan.

Manakala bagi cadangan Projek Membina Jalan dari Kampung Sungai Melayu ke Kampung Sungai Limau, Sebatik, Tawau, Sabah telah tersenarai di bawah Senarai Keutamaan Kerajaan Negeri dan akan diangkat bagi kelulusan RMKe-12 *Rolling Plan* seterusnya. Walau bagaimanapun, kelulusan adalah tertakluk kepada kelulusan oleh pihak Unit Perancang Ekonomi, Jabatan Perdana Menteri (UPE, JPM) dan kedudukan semasa kewangan kerajaan.

Sekian, terima kasih.

**PEMBERITAHUAN PERTANYAAN DEWAN RAKYAT,
MESYUARAT KETIGA, PENGGAL KETIGA,
PARLIMEN KEEMPAT BELAS**

PERTANYAAN : LISAN

DARIPADA : TUAN LIM KIT SIANG (ISKANDAR PUTERI)

TARIKH : 25 NOVEMBER 2020 (RABU)

SOALAN

Minta **MENTERI PERTAHANAN** menyatakan perkembangan terkini program Kapal Perondaan Generasi Baru "*batch*" kedua dan program susulan Kapal Misi Pesisir di bawah RMK-12.

JAWAPAN

Tuan Yang di-Pertua,

Perkembangan terkini program perolehan Kapal Littoral Combat Ship (LCS) sehingga 1 November 2020 adalah 57.01% berbanding dengan perancangan asal 90.11%, iaitu kelewatan sebanyak 33.10%.

Status kemajuan pembinaan mengikut kapal adalah seperti berikut:

1. **LCS 1** - status siap semasa 60.60%;
2. **LCS 2** - status siap semasa 48.09%;
3. **LCS 3** - status siap semasa 43.75%;
4. **LCS 4** - status siap semasa 36.49%;
5. **LCS 5** - status siap semasa 22.09%; dan
6. **LCS 6** - status siap semasa 0%.

Bagi program Kapal Misi Pesisir atau dikenali sebagai *Littoral Mission Ship* (LMS), perolehan 8 buah LMS *batch* yang kedua telah didaftarkan di dalam Rancangan Malaysia Ke-12 (2021-2025). Walau bagaimanapun, perolehan aset-aset kapal tambahan ini tertakluk kepada kemampuan semasa kewangan kerajaan.

Terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN BARU BIAN [SELANGAU]

TARIKH : 25 NOVEMBER 2020 (RABU)

SOALAN

TUAN BARU BIAN [SELANGAU] minta **MENTERI KEWANGAN** menyatakan rundingan berterusan antara Kerajaan Negeri Sarawak dengan Kerajaan Persekutuan dan PETRONAS, apakah perkara yang sedang dibincangkan dan apakah perkara yang telah dipersetujui, jika ada.

JAWAPAN

Tuan Yang di-Pertua,

Untuk makluman Yang Berhormat dan Dewan Yang Mulia ini,

Kerajaan Negeri Sarawak dan Petroliaam Nasional Berhad (PETRONAS) sedang dalam rundingan untuk mencapai penyelesaian komersial berhubung urusan minyak dan gas serta cukai jualan ke atas produk petroleum di negeri Sarawak selaras dengan Kenyataan Media Bersama yang dikeluarkan pada 8 Mei 2020.

Rundingan mengenai perkara ini akan dimuktamadkan melalui satu perjanjian penyelesaian tidak lama lagi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KETIGA,
PARLIMEN KE-14**

PERTANYAAN : LISAN

DARIPADA : TUAN CHOW KON YEOW [TANJONG]

TARIKH : 25 NOVEMBER 2020 (RABU)

SOALAN

TUAN CHOW KON YEOW [TANJONG] minta **MENTERI KEWANGAN** menyatakan minta **MENTERI KEWANGAN** menyatakan sama ada jaminan Kerajaan Pusat akan diberikan kepada Kerajaan Negeri Pulau Pinang berhubung permohonan pinjaman atau menerbitkan bon bagi membiayai projek Aliran Transit Ringan (LRT) Komtar – Bayan Lepas. Jika tidak, perincikan sebabnya serta inisiatif Kerajaan Pusat bagi membantu merealisasikan projek ini demi kepentingan rakyat Pulau Pinang secara menyeluruh.

JAWAPAN

Tuan Yang di-Pertua,

Untuk makluman Ahli Yang Berhormat, dasar semasa Kerajaan untuk memberi jaminan adalah secara terpilih. Sebarang pinjaman baharu dengan jaminan Kerajaan perlu diteliti sebaik mungkin kerana ianya akan meningkatkan contingent liability Kerajaan. Peningkatan contingent liability Kerajaan yang tidak dikawal boleh meningkatkan risiko fiskal dan menjejaskan penarafan kredit Malaysia yang diberikan oleh agensi penarafan antarabangsa. Oleh itu, adalah wajar bagi Kerajaan menghadkan exposure jaminan Kerajaan dengan menyusun semula projek mengikut keutamaan dan keupayaan bayaran balik hutang tersebut. Untuk

rekod, sehingga 30 September 2020, jumlah jaminan Kerajaan adalah sebanyak RM289.8 bilion atau 20.1% daripada Keluaran Dalam Negara Kasar (KDNK).

Mesyuarat Jemaah Menteri pada 19 Julai 2019 telah bersetuju bahawa Kerajaan Negeri tidak boleh membuat pinjaman yang melibatkan jaminan Kerajaan tanpa mendapat kelulusan Kerajaan Persekutuan terlebih dahulu bagi mengelakkan bebanan hutang ke atas kedudukan kewangan Kerajaan. Sebarang kelulusan terhadap pinjaman baharu yang melibatkan jaminan Kerajaan hendaklah dipastikan tidak menjadikan jumlah hutang Kerajaan melebihi had siling statutori yang ditetapkan.

Sebagai makluman, Kementerian Kewangan (MOF) telah menerima surat daripada Bank Pembangunan Asia (Asian Development Bank - ADB) bertarikh 25 Januari 2019 mengenai permohonan Kerajaan Negeri Pulau Pinang yang berhasrat untuk mendapatkan pinjaman ADB bagi membiayai projek transit aliran ringan (Light Rail Transit - LRT) Pulau Pinang.

Selaras dengan semakan unjuran hasil dan pendapatan negara pada masa ini serta tumpuan Kerajaan dalam memulihkan ekonomi negara susulan penularan wabak COVID-19, MOF telah memutuskan untuk tidak meneruskan pinjaman ADB berjumlah USD500 juta atau RM2 bilion bagi membiayai projek LRT Pulau Pinang yang bernilai RM9.5 bilion.

Pinjaman ADB untuk membiayai projek LRT Pulau Pinang sekiranya diteruskan akan menambah komitmen kewangan Belanja Mengurus (OE) dan Belanja Pembangunan (DE) Kerajaan selain daripada projek-projek off budget yang turut ditanggung oleh Kerajaan seperti MRT Line 1 dan 2 (RM71 bilion), LRT3 (RM17.7 bilion), Lebuhraya Pan Borneo Sarawak (RM13 bilion) dan Landasan Keretapi Pantai Timur (ECRL) (RM48.85 bilion).

Berdasarkan Kertas ADB mengenai “Diversification of ADB Financing Terms for Regular Ordinary Capital Resources (OCR) Sovereign Lending Operations under Strategy 2030”, pinjaman Kerajaan Malaysia dengan

ADB akan dikenakan dengan kadar dan kos pembiayaan yang lebih tinggi. Ini adalah kerana ADB meletakkan Malaysia di bawah kategori C3 (upper middle income) yang mempunyai maturity premium yang lebih tinggi, dengan spread di antara 0 - 50 basis points (bps) berbanding dengan 0 - 20 bps sebelum ini.

Di samping itu, tiada keperluan mendesak untuk Kerajaan mendapatkan pinjaman mata wang asing. Ini adalah kerana risiko kerugian pertukaran mata wang asing (FOREX) juga perlu ditanggung oleh Kerajaan sekiranya pinjaman dibuat dalam mata wang selain Ringgit Malaysia (MYR). Strategi pengurusan hutang negara adalah untuk membangunkan pasaran modal domestik dan mengurangkan risiko volatiliti dalam FOREX agar kedudukan hutang negara tidak terkesan apabila berlaku ketidakpastian luaran dan krisis kewangan global. Oleh itu, Kerajaan perlu meminimumkan pinjaman dalam mata wang asing, terutamanya dalam bentuk kadar pinjaman terapung.

Pinjaman projek LRT Pulau Pinang dengan ADB, merupakan pinjaman multilateral yang perlu dipohon peruntukan di bawah perbelanjaan pembangunan (DE). Sekiranya Kerajaan bersetuju dengan sumber pinjaman daripada ADB, peruntukan perlu disediakan di dalam belanjawan tahunan dan Rolling Plan, Rancangan Malaysia. Dalam hal ini, pihak Kerajaan Negeri Pulau Pinang perlu meneliti semula projek yang perlu diberi keutamaan. Projek keutamaan tersebut hendaklah dikemukakan untuk penelitian lanjut Unit Perancang Ekonomi, Jabatan Perdana Menteri untuk dipertimbangkan di bawah Rolling Plan, Rancangan Malaysia yang akan datang.

Sekian, terima kasih.